

CINDHAMASO

Eretriyat cindhamaso kee darasahi aglet majalla

- ★ Ninni waqhte cilleh nixiggirih, nassaxadaadaro!
- ★ Farhshiishinnexe taknolojidde, ninni waqhte aylay wayno!
- ★ Ishi nabse cilleh tikxinih teemenemko, ishi xuggit takxano kee taamano kito!
- ★ Saawalle, adabe, aglet martiino, waqhti missil amnaafac, doodadti cayda kee xishmamti irhgah ginnimta.
- ★ Saytiya, cari ifoyta kinni

JANUARY 2023
Nibro 9





Eretriyat Cindhamaso kee Darasat Aglehi Majalla

Nibro 9
tahssas 2022

Daanisheena
Suleeman Maxammad

Kabisheenit
Jamaal Maxammad
Suleeman Maxammad

Shuqhle abshiisheeni
Mesfin Gebrehiwet

Agoogisheeni Dizayin
Kamaal Diino

Leyawut
Suraafiyel Tesfabrukh

Ta majallalle litin mablo, farto yakko ayra
ta kataya cinwaanah noh dhirhiyanta.
Gaab noh isho!

Cindhamasot Majalla
Fartot Sanduqhih Nibro 1042
Talafoon 202592
Faakis 125981
Imeyil: menesey@eriyouth.org

Majalla Tayfiddigem
Talafoon 125394

Dhibrho

Daanisheeni farto 2

Aglet Watsam 3

*Qamatat kee Istiratejjiyyin xagaraalih
yamboloolowe taqhyiim yekke 2023 ti
cusub shoqhli barnaamij firsiime*

*Madaarisille dimaclem kee wahassa
barnaamijja takko, sirii hammeh
yamshuqqule*

Cindhamasot Gondo 5

*Muzaakarah yakke anqaraarab, arux,
taror kee xeelal*

Ninni nabsehi kaxano ... 11

Nagra 14

Wasiya

Mihra kee uray 19

Mahandis Maxmud Maxammad-Saciid

Cayda kee cijaajinna 25

Mii feera

Daanisheeni farto

Xishmale qaari: Saaho, amaa Eretriyalle geytimta 9 luqhaako inketta tekkih, Afro-aasiyahi luqhat xawazko, kushti xakadde geytimtam, ta luqha, amaa tabbuxute addat gadda (cayda, sugte, labcad, cibba, taarik...a.ra) baclasso, dhuwudhdho, gannaaxishsho kee ijooko ijolle tillallaabishsho hidhdhah lel, qaalti luqhaako, kutuub luqhalle tanabo alle tanem, tayim abto dhictam lel, tee wannun yudrusiinih, adde xarkakitan gedda bisah kinam, tillaabe thabcit ta majallahiyadde, gabbabbacnih niqhriih ninino. Tayim farhshishsha masxassa hido duhsus kinamhi sabbatah lel, ta 9it thabcadde gantah, gabbaacimtih tane. Ta luqha kutuubuh sigtemko taahe, kambih wuli 208 iggidiya (1814-2022) taallo kiyah, tee wannun, tee dhawrho kee ayfaadadadde, missil afto abeenih miyaniini. Amaa gedda lel, ta luqhahi wannunuk, fertoh lel, tudruseyaako, darse kee darse yable shoqhlehi ammotulle yane marak, ninni nabse essernam kee adde xarkakinnam, waqhti yathlibe gondo takko kinni.

Ninni luqhahi ayfaadad kee ninnirhgahi ayfaddanah, darsi abittohi ammatalle yane mara kee aniinnexe mara, fertoh lel cindhamaso tasgalle, “Eretriyat Cindhamaso kee Darasat Aglehi Majalla,” noh toobokih, carsiima tane. Akah fadhdhitimaakah carsiima hido anabi mitane narhxo laakin mirhicna. Amayim lel, ta majalla, iggidalle lamma waqhte tawco tamxaggaro kiyah, iggidalle inki waqhte bisah kinni, awci tanem. Amaa tee caawiinohi sabab mangom yakko kiyah, “Ishi qasbiya tiskimilih, ishi mussul ilaalit” yaanam tanemhi sabbatah, ummanti gaba adde assagalluk, ishafto abo alle tane. Ta akki tane caawiino farhe gabooko kee farhe sababah tekkemih, cafuuka akah esseraanam fadhdhitimta. Amaa gedda lel, tee ilaltah, bar kee lallecih waacinsittamak, ta saadifih nelle mabbarhina arhxinuk, labcaadime suurarle, nibro 9 jabaa sinak narhxe.

Ta 9it majalla, cusub darsi iggidahi erherhidde tawco ilalti alle yanemhi sabbatah, darseelih tadiyem kee fertoh cindhamaso yable dhibrho galeeliito ticikkinih tane. Ta majalla bukaako, koonaa naba camidda (Aglet watsam, Cindhamasot gondo, Nagra, Mihra kee uray, kee cayda kee cijaaajinna) tabbirhe. Tayimko mangolem lel, masalan “Aglet watsamhi” rigidille, ‘Madaarisille dimaclem kee wahassa barnaamijja takko, sirii hammeh yamshuqqule’ yarhxe dhibrho, “Cindhamasot gondohi” rigidille lel, ‘Muzaakarrah yakke anqaraarab, arux, taror kee xeelal’ yarhxe dhibrho, tibbirhih geytimta. Aki-ginah, amaa aki raace dhibrhoooko mangolem gantah, walaah akkanih akke wayemih, darse, cayda kee mihra kee uray tablem kinni. Bukaako lel, ta adde nanino mudda, ishi caduu darse kee irhgah kiyah, aslaxah adde yaxeerebin mudda makinamhi sabbatah, naslaxa kee nimabaaro unkoh, darse kinam neerhegeyaako, darselle nammaakamo. Yalli lel, adde nixato.

Erherh thabcahi zacabah yomxowweh yine mablol nubleyaako, abittodde ashishno kiyah, dherh waqhteh, leddi majallalle aybulluwinnixinuk sugnemih cafuuka essernak, amaa mablol, 7it majallalle kab sinah ishnem tamidhdhige. Amaa afti thabcaako sarrah, mablol yaxay mara yakko, gaba tasgallem, mimango. Tayim laakin, takko missilam makinamhi sabbatah, taginale mablol kee ayrar, dhuguugulo ilalna. Nanu ta asqirribi tanemik, nishoqli, maglelliinan bisah kiyah, shoqli umman marahitiya, majalla lel nabaatih, umman marahi bada kinam neerhegeyaako, hayya umman marak, gaba adde nassagallo. Amiitinnan kutuub lel, ishiishi farhshishnan kee aftiino balik saw kinamah, nookomih ahde sinah sayna.

Abayshimolle lel, rixsele, ibak kallale, sanak ximboleh, anasle cusub iggida 2023 noh abo nattiminniye!

Aglet Watsam

Qamatat kee Istiratejjiyin xagaraalih yamboloolowe taqhyiim yekke 2023 ti cusub shoqhli barnaamij firsiime

Eretriyat Cindhamaso kee Darasahi Ardeeyin Agle, “Cindhamasoyti war-hadimo, yamnazzamo, yakkataw!” tarhxe teemahi rigidille, 2022hi Taxsaas 23-24 abte iggidi taqhriiridde, 2022 yekke ayqarirti taqhyiim abteyaako, 2023 yakke cusub shoqhlehi barnaamij fiirishshe/tixiggire.

Aglet fanti maktabti naba mara, zoobabti mara kee cindhamasot wokola adde tengele akottalle, malammit darajat darasahi war-hadohi aynobiyah umbakale zoobaballe mudhdhuguh yekke siivilti darse, cindhamasot mihraayin dhictohi aynobiyah, umbakale gulub baacilti aynazzamah yomxowwe emmengaa yarhxe darsit, cindhamaso wakali andhadhdhosulle yaallin war-hadohi aynobiyah, yekke zaalishnan kee garabbosnan fidin shoqhle, cindhamaso taarik kee Eretriyat doodadti xishmanti idhdhaage aynobiyah tekke barnaamijja, kee yane wadcedde fahme kee angolla taynabe, aglet kaadiira kee dambar kee doolat naba marahi araxah tekke saminaara, mawcolem kiitinem caddoyte.

Kabyerhxe taqhriir, amaa awwalah yowcuh yine qamatat

kee istiratejjiyin xagararlih tamboloolowem kuukyinemhi sabbatah, amaa yekke shoqlitti waddiror kee tanto caddummih taymingidem kee feere shoqhleh dufuffuutam gantah kuukyine. Amaa akottalle yekke cadade, yomxowwwe mablol kee esseror yurkuteyaako lel, 2023 edde, barhsimte aglet faslitidde yakke idhdhaage kee war-hadoyishnan abittot kee aynazzamak, asle kee abittot goorintam yakko, kulliyaat darasah yanqirribe uguugusti kutuub, saminaara kee darsit, waqhte dhawudhdhem kee ten darajaalih tadiyah yakko, tudruse kaadiirah missil hamme kee katattaa akah yomxowweyaako, aglet ayqarirti aynobiyyadde sinnafto aboona, shaqqaala kin cindhamasohi afto kee abitto doodalle tanabo, izaaca, cayda kee uguugusti barnaamijjalle cilmeeyinnah yumshuqqulih, dimacade akah assaakah takko, cindhamaso andhadhdhos kee giraaredde, idhdhaaget kee fahmeelih yangaloona, cijaajinna kee asannacade akkuk suge shoqlit, tamcakkoto dhicta firelle yanabo, cindhamasot ardeeyin mahrajaanah farhshiishaanqaraarab yakko, kulliyaat mahrajaan kee cindhamasot ayyamta kee maglellii girir gurrah yakko, cindhamasot

soxoba kin naba mara, kee doola kee dambarti dhishosh yanabo, diplomaasiyin shoqlit ishi aftiinohi farhshishnanah yakko, kee akimih, inkiddehi fahmi guffutumih, zate tekke.

Aglet nabatiya kin Asseyid Saalix Axmaddiin gomnanalle, EDCAA; cindhamasot xayla kee quwa maglelliitih, cindhamaso kee ardehi makkodde asishsho hidhdhah dhishshimte agle kinam caddoosak, 2023dde gantah aglet erherh hammi, malammit darajahi madaaris, Waaris-Dhiiceenahi Saawi madrasa kee kulliyaatadde, dimaclemkeaslekinbarnaamijjahi abnan kinamhi sabbatah, madrasa, kulliya kee cindha-zoobahi xaddeh doorime dhishoshuh sirii hamma yomxowwih, amaa dhishot zoobit, aglet ayqariridde wannun yekkiinih akah yashtuqhuliiniikah abaanamalle sirii-ginah yamshaqqalo kinam yiyfihime.

UDDC (Ummaatin Dambar Dimokraasi kee Cadle)hi maglelliiti nabatiya kin, Asseyid Yuusuf Saaiqh yoxow santodde lel, EDCAA shohodat amaana kinam caddoosak, agle dimacle maglelliiti arax teynebih, yane wadcehi barnaamijja tisqirribih, qarce-lem, salaaxa-lem kee dhicto-le ardeeyin barnaamijja abto xunsuuse.



Madaarisille dimaclem kee wahassa barnaamiija takko, sirii hammeh yamshuqqule

Eretriyat cindhamaso kee darasahi ardeeyin agle, 2022hi malammit abrhadde, malammit darajahimadaarisilleyakkewar-hadoyishnan kee maglelliiti abittot dimaclem kee cilleh wahassam yakko hidhdhah, aftiino akah tomxowwih alle yamshaqqalo kinam, Xamley 24h Asmaralle abte, lixa alsahi taqhyiim akottalle caddosse.

Amaa cindhamasot fanti maktabti faslitti naba mara kee zoobabti araxah kab yerhxe aqhayyanti taqhriiridde, abittot, kibra kee labcadadde hammittih, amaa aglet zoobit kee cindhamaso kin cummaalalah yomxowwe, asxadaadar kee santishnan darsi mawcolem kuukyinem, kileebat maglellii kee tee aftohi aynobiyah fiyyiime arax cilleh aydukumusatiya kuukyinem, cindhamasot idhdhaaget kee war-hadoyishnan aynobiyah ugute, 'Buyyat taarik irhgahi ammakaakamti' barnaamij, umbakale zoobaballe cilleh missil araxah yekkem, amayim balih lel doolat dhishoshti qadri aynobiya kee cindhamaso mihra geyeenih, sinni nabse



dhiicoona hidhdhah arax akah fiyyiimo kee cindhamaso kin cummaal kee agani darsehi dhishoshti darasah yamxawwe mihrat darsi aydukumussam kuukyinem caddoyte.

Tayimko bextih amaa agle, 2012ti malammit abrhadde, casa-xombooba, fitwaraari, ximmeret kee kaadiirahi, xeewin maglelliih aftiino akah tomxowwih, cilleh alle yamshaqqalo, darasalle, darse kee qiraa-ahi kaxano yaynabe ayqarir yakko, cummaal kin cindhamasohi maglellii dimacletiye kee wuli aftoletiya yakko hidhdhah, umbakale zoobaballe, mudhdhug kin barnaamiija orobto/takko, madaaris kee kulliyitidde yamxawwe, war-hadoysa darsit kee uguugus yasraw/yatraro, doolat xaakok kee dambarti amsaana, cindhamasot gondodde, amayim balih cindhamasot soxoba kin naba marahi maglelliih mece shoqli yakko, irot cindhamasohi maglelliih yane zamoodiini yagbado kee aglet wahas yanabo, UDDC (Ummaatin Dambar Dimokraasiya kee

Cadlehi) maglelliidde, agle ishi afto abto, cijaajinna kee asannacti aynobiyadde, farhshishsha pirojektiita takko kee akimidde, zate tekke.

Amaa aglet nabatiya kin assayid Saalix Axmaddiin yoshshoobbe gomnan madaradde, agle ta iggidahi erhedhdhot abrhadde, cindhamasot siyaasat war-hadohi dhicti aynobiyadde yekke shoqlit, amaa aglet zoobitti xayla kee amaa aki teelih gaba yassagalle marahi xatoh tekkem kinam caddoose. Niqhamata, Eretriya nardi, darseh ummannimko naba afaadadi daraja gufo hidhdhah kinam xusih lel, taginale, arde kee doodahi shoqlitti salaaxadde naba afto digirtam, madaaris kinni, yerhxe assayid Saalix Axmaddiin. Ta farhshiisha badale kee afaadadi santo kin madaarislih, amaa agle abto tixiggirih tane war-hado kee maglelliiti fidin barnaamijti salaaxadde, amaa gaba yassagalle marahi gabooko, farhshiisha xattishimnan yakko deece.



Cindhamasot Gondo

Suleeman Maxammad

Muzaakarah yakke anqaraarab, arux, taror kee xeelal

Ta adde saynih nanino Maskarram alsi, akkinnan darasatti cusub fasle adde erherhisha, darsi iggidahi erherh alsa kinam, farhetyaako sucuttam makin. Amaa gedda lel darasakke adde adde tillaabinnan faslehi darse adde erherhishna waqhte kinni. Akkinnan xaaja ukumaako caynittemko tamco mirhictamhi sabbatah lel, ninni darse meceetih ukumusno nelle tane. Amaa gedda lel xishmale darasa, ninni darsehi ukuma nassamaaco nelle tane. Adrusinnan dhibrhi nelle bukaabukitinnixuk nezeekeremko lel, nidarsehi ukuma tagrire, ossiiminnanim hidhdhalle lel, agriruk yadiye ay darsi. Aaginaha laakin, nassagarraro dhicnam? Muzaakarah! Nimuzaakara laakin, ishaarax tibbirhetya kee gurra letya takko alle.


Muzaakaradde saynih erherhishman warah nookomih abno nelle tanem, xadde male. Amayimko wulim lel, ninni waqhte meceetih nasxedeederem

kee naxiggirem, ninni nabse cilleh nasqirribem, mece dhin dhinnam, muzaakara nokko andafishsho dhicta, aki masangalet xaaja asacnam kee teknolojille, cilleh addeede waynam kinni.

1. Ninni waqhte cilleh nixigirih, nassaxadaadaro!

Baxuurooko baxuurole tillallabta xagara abinno. Amaa xagaraako awcinnixinuk lel max maxah, saaca saacah, daqhiiqh daqhiiqh raacinnixuk,

amaa abne xagaralle, cilleh alle namnaafaco. Dhiicimak, niqhadreeko aganalle kin cuzri aseedefe wayemko, ninni xgaraako akah awce waynaakah ninne nasqarrabo. Ferte muzaakara fadhdha xaaja kee adde fadhdhitimta waqhte (imtixaan waqhte), nookomih naxaggaro nacakkano. Tayim lel, ninni xagaraako nawcemko nixatta. Akke wayemko wuli daddaguu ankalaalab abno dhicna. Ummanimidde nankalaalabo arhxinuk, ninkillibih racnamko laakin,



selinno.

Muzaakarat andafo
nok takko dhicta, betto,
cakalso, sarinnan, cari
shoqhle, digir...a.rahi
waqhte, muzaakaraalih
akah amootoke wayaakah,
nookomih naxaggaro.
Akkinnan darsi cayna adde
nazeereke waqhte, cari ciyo
takko cari shoqhle adde
abna waqhte, adde digirna
waqhte kee aki ayqarir adde
abno lino waqhte, lalleeca,
saacut kee daqhaayiqhih,
luxulle nayballaw; cilleh lel
akah santishimno. Dhaxiine
muzaakarah ugunnih, waqhte
cakalso kee fathuurudde
neyleemko masalan,
buhtaanadde asne, yan
macna kinni. Ayim abnam,
manda kee aaginah abno
linom, nookomih nixiggirih
akah ninqirribemko laakin,
ummanna ishi waqhteh takko
kee salaaxa geytimto dhicta.

2. Ummannah, gulgul nakko!

Ummanna yaxiggiriinim
kee amaa xagarah yadiinim,
magnum farhshishsham
kee salaaxa lem kinam,
ushshukuum ishnihi ablinuk
sugne. Yakko kiyah laakin,
bashar kinom hidhdhalle,
roobot balik gura-mizgalle
arhxinnixinuk inkaaraxalle
nadiyem wuliili waqhte,
tanficem akke wayto gantah
dhicta. Axeesebinnixinom
tasaadafo kee amaa nookomih
abne, waddiroo akyan
xagaraako nitaylalakko

dhicta. Amaa gedda lel
umman caynahi badaleh,
gulgul ninnekke abno.
Dhiicimak laakin, nookomih
ummanim tarhmice xagara
nayyaaco nacakkano. Addosat
waqhti geytimih, fertem
yaysilixiinim lel mitamnicibe.

3. Mece dhin dhinno!

Fertem nashtaqhalo
kee naysalaxo hidhdhah,
dhiica waqhteh dhinno.
Baniyaadamti roobot balik,
acrufinnixuk yashtaqhalo
mirhiica. Xangal carufe farha.
Acrufe wayemko, ummanna
akko tambedeedexih, inkim
abo mirhiica. Miyashtuqhule,
mirhiina. Ummannaako
birhaya, yan macna lel kinni.
Amaa gedda lel axiggirinuk,
dhinti saacut (bar malee
itre), xagaradde hayno. Dhin
yaymangiinim mimece,
daggoosaanam. Ummanna
ishi xaddelle kinni, mecem.
Acrufinnanim hidhdhalle
xangal yantexeexede,
yacussubem lel, maarhagit
warishan. Amaa gedda lel
xangal dhinihi diihishe wayno,
shoqhleh taanishe wayno.
Ummanna ishi qiyaasalle
cirhe leya. Ashtuqhulinuk
hido azeekerinuk gantah,
fanadde carufi fadhdhitima.
Inki saacahi muzaakara
nixiggirih abnak ninniyemko
masalan, akkinnan 15 hido
20 daqhiiqhyadde, wuli 5
daqhiiqhih nacrafo hido
nabsi xumuuka abinno. Ta
waqhte, nookomih gantah,
naxaggaro nelle tane. Akke
wayemko, acrufinnixinuk

abna muzaakara, dimaclem
takko mirhiica.

4. Asgoogolla kee bukaabukusan asacno!

Magoo xaaja xangaladde
neellemko, awlihimidde
hamminnam kee amay sarrah
ayim katasnamadde, waqhte
beynih adde naxaasabo.
Masalan wuli darsi cayna
nazaakaro nerhxih, wuli saaca
yakke waqhte nixiggirih
nanino narhxonnaa. Ta darsi
caynaako nazaakaro linom,
awlih curfa, awlih suura,
awlih cindha-suura kee
aaginale dhibrho nazeekerem
kee aymih nazeekerem
aarhige waynemko, meceetih
nazaakaro kee dimacadde
asno mirhicna, fan-fanalle
racna. Amaa gedda lel,
ayim abno linomhi xagara
nookomih, caddummih
nassamangado. Amaa xagarah
lel santishimno. Xaajah
aftiino naxaw, inki waqtelle,
inki xaajadde hamminno.
Bukaabukuse wayno.

5. Farhshiishinnexe taknolojidde, ninni waqhte aylay wayno!

Dhiicimak, daftaar hido
kitoobulleakahnazeekereekah
kee farhshiishinnexe
teknolojji hido kahrabaayin
xaajadde akah cikkishite
waynaakah naxaggaro.
Kahrabaayin xaaja masalan
helya-foonulle nazaakaro
nixiggiremko, masangaleeko
xadde hin farhshiishinnexe
xaaja nedde tamaato dhicta.

Amaymidde hamminnih lel, amaa farhshishsham kee nibahtem abinnixinuk/azeekerinnixinuk racna. Helya-foonudde masalan, mango farhshishsham kee irhga akko geyno dhicna dhibrho naallo dhicna. Aki xaaja faknih laakin, ninne aarhiginnixinuk, amaa farhshiishinnexe dhibrhooleh dherh arax kallaxnih, urhurh araxadde tine farhshishsha xaaja xabno kee ninni waqhte naksaro dhicna.

Interneetko masalan, mango barhsiime masxassas kee irhga geyno dhicna. Cilleh missil araxah alle amneefece waynemko laakin, kaa nafaacaako, kaa aziya taczabo dhicta. Amaa gedda lel, teknolojji kee kahrabaayin xaajaako, nabaatih ninne nabbarho yaanam makinki, missil araxah amneefecinuk, dimacadde ashishno, yaanam kinni.

Darasakke fertoh ninni shoqhle/muzaakara kee osat shoqhliit, thummutuh naxagaro, akah santishimno, cilleh abittooyishno. Badale kee aklibinnexe ankalaalabah lel, umman waqhte gulgul nakko. Xishmale darasa, amaa muzaakarat xagara kee anqaraarab yable dhibrhooko, muzaakarat arux kee taror tablemille sin tillaabishno.

Muzaakarah abno nelle yane anqaraarab tablem, fato-fatoh ablinuk sugne. Amaa akah ninqirribih nanino muzaakara

akah abno lino arux kee taror tablemko (idhdho, essero, qiraa-a kee taqhriir), garacnan xibar arax, farhshishshamadde hamminnan, arure, karditti amnaafac, aysaana, ayrakat, muzaakarat kee waraqhat-hi amnaafac terhxem, fato-fatoh nablo kino.

1. Idhdho, essero, qiraa-a kee taqhriir aruxti amnaafac

Ta aruxti amnaafac fertoh nanqarrabo, hammeh adde gaxno, ninni canaakohi farhi kee niya naallo, gabbabbacno kee ninne naqhayyamo niyanfice. Amaa nazeekerem lel, rummahi nim kee ninafaaca kinam neerhegihi, ninnelle cilleh kabishneyaako, nazaakaro kee makko akko geyno dhicna. Ta arux tiya-tiyah nable waqhte lel:

Muzaakara idhdhoh (amaa azeekerinuk nanino dhibrho aaginale kinam, ayim kee ayim yibbirhih yanem, awlihimidde fertoh hamminna gedda yashshem kee ...a.rah) erherhishnam, muzaakaradde cilleh nixatta xeela kinni. Amayim lel, luuxadde tanem, siileh tanem, suurarko leyaam, feere hamme fadhdham, kee akim akko nashsharhaarhago kee ruhuu araxah nazaakaro nixatta. Amaa gedda lel, muzaakara warah anqaraarab akah abneekah, amaa muzaakaradde akko sayna ifee gantah, cilleh nashsharhaarhago nelle tane. Tayim lel ruhuwamko siriyaamalle nadaw gantah

nixatta.

Muzaakarakke ifee akko geynih azeekerinuk, amaa nazaakaro linom, esserot xibarah haynemko, medebbo alle naxaw kee ninni xangaladde siggishinno nixatta. Amaa ninni esseror kee medebbob lekkin niqhreeyaako lel, nibbirhem kee abbirhinnixinomhi taqhriir, ninneh, ninni nabselle kabishno. Amayimko ninni nabse niqhiyyimih lel, leddimih, cusub xaylaalih ugunno. Amaa dhibrho aymih azeekerinuk naninom neerhegeyaako lel, ninni addadde meceetih orbishinno. Tayim lel unkoh Idhdho, essero, qiraa-a kee taqhriir aruxti amnaafacadde galeelimta. Malammi lel garacnan xibar arax kinni.

2. Garacnan xibar arax

Wuli suuraako aki suuralle tabnak, amaa awwalah alle ninsire arax hido xeela garacnih tabno nacakkano. Awwalah alle ninsire araxalle adiinuk ninniyemko, dagih amaa muzaakarat araxlih nemeerhegihi naninomhi sabbatah, darsi gantah fertoh yar-haw dhiica. Suuraako erherhishno. Ninni nabse fertoh naqhayyamo kee ninni adda nabbarbaro, amaa ninneh nezeekerem, garo (amaa noolih yadruse) mara nashshaabbo hido kab alle ishno. Suura suurah alle adiinuk, amaa niqhreem, esserorulle niybiddilih gantah

sittiya essernak, sittiyallo nadabbo. Amaa azeekerinuk nanino suura abayishnam warah, azeekerinuk nininom gomno kee noytsoororih, kaa arure kee makko, lux, siile, giraaf kee aki urhurhi yamsharraxo dhiica araxah nayyaaco nacakkano.

3. Farhshishshamadde hamminnan

Amaa naqhree hido nazeekere kutuub akah yaneekah aqhriinuk, ishaarisheena (highlighter) nibbirhih amaa cilleh farhshishsham kee tandhabbarho missilamalle akko tuumaarishno. Talle laakin, ummanimille tuumaarishnamko selinno kee fertoh farhshishsham kinni, akko narhxemille bisah tuumaarishno nelle tane. Ishaarisheena aalle waynemko, amaa farhshishshamko, risaasah rigidille akko fiirishno kee wasunulle ninni marhxoxuh, ninneh akah nafhamo dhicnaakah, wuliili ishaarar/marhxox akko naktabo dhicna. Ummannimhi warah laakin, amaa nazeekerem, cusub gulubulle hido biyashshiitinnixinuk, naqhraw kee missil farto akko raacishno dhicno nelle tane. Waqhte beyemko laakin, nokko yamlalakko kee yankataataw dhiica. Amaa gedda lel abno linom, waqhte beyinnixinuk cusussaabelle abinno kee amaa nazeekere kutuubko, missil farto kee

arure akko nibbirheyaako, ninni addadde meceetih orbishno nelle tane. Amayim lel, misooluh goorishno kee maxyeenimti ninni nabraalih nayrhabaabasho, amayim balih lel ninni gabah soomamno nacakko. “Yoobboonim biyashshimta, yubliinim xunsuusumta, abeenim mibiyashshitaaki marta” yaanah.

4. Arure

Abna muzaakara cilleh dimaclem akah takko dhicta aruxko inketti, amaa yanqirriye fidin kutuubko, sinneh akah yafhimin araxah, urhurham kee yanfahamo dhiica nuqhoth yayyaaciinim kinni. Amayim abnak lel, amaa akah ablinuk sugneekah, amaa naktabo linom, urhurh waqhte bisah xunsuusumtam takkemko, ninni addadde cilleh orbishinno kee akah niyatneyaako, makkodde ashishno nacakkano nelle tane. Arure ayyaacinuk, meceetih noh yamballaw kee noh yanfahamo hidhdhah, barhsiime beenoh namnaafaco kee sittiya katattaya suura; naba suura, cindha suura, cindha-cindha suura kee tee rigid-hi suura hayno nelle tane. Amayimko bextih gantah azeekerinuk, arure alle naktube cindhudhdhuu kardit namnaafaco dhicna.

5. Karditti amnaafac

Alle nazeekere, wuli cindhudhdhuu kardi

nibbirheyaako, wuli gazaako esseror hido cilleh farhshiisha nuqhoth, aki gazaako lel, amayimhi medebbo alle naktabo dhicna. Taginale kardit nabbirhem erherh meceerherhih, alle adiinnanille, inki waqhaaqhac hinnim alle nazaakaro nitanfice. Malammihi lel, ninne essernih, ninnelle nadabbo hido lel, esseror kee medebbob ayseeneynuk hido ayboloolowinuk nazaakaro nitanfice. Tayim laakin, waqhtiyanah takke muzaakara kee waqhteelih tahfifem takkemko hidhdhah, amaa ushshukuum ishnihi akah nubleekah, ninni maxyeenimti nabra kee gerhgerhlih arhuwinuk kee misooluh goorishnak, abittootim akkabno nacakkano nelle tane. Aysaana kee ayrakat gantah, amaa muzaakarat xeelalko, wulim kinni.

6. Aysaana kee ayrakat

Aysaana akyaanam, nadrusem kee nazeekerem unkoh buhtaan takkemko, misooluh goorishnak kee barhsiime aruxuh, ninni maxyeenimti martiinoolih arhuwinuk kee ayseeneynuk abna darse kee muzaakara kinni. Tayim lel amaa nudrusem kee azeekerinuk naninom ninnelle fertoh kab ishishno kee nim kinam neerhegihi, ninni makkodde assishinno kee akko namnaafaco nitanfice. Amahe abe waynemko laakin, adrusinnanim kee

azeekerinnanim, urhurh
waqhteh nabbarho kee fatana
takko imtixaanko tillabna
waqhte biyashshimto kinni.
Aakuminnanim towcih,
acussubinnanim orobtam
tekkemko lel, kumal hin
kaafa kee kaafa hin beera
akkinuk nanino yan, macna
kinni. Amaa gedda lel, kumal
neellih, kaafa naallo kee
kaafa neellih ninni beera
naddhaasho nacakkano.
“Yoobboonim biyashshimta,
yubliinim xunsuusumta,
abeenim mibiyashshitaaki
marta” yaanam lel, taginah
abittooyimta. Darsi
muzaakarah missil anqaraarab
abno kee azeekerinuk lel,
barhsiime taror kee xeelal
namnaafaco nelle tanem,
ablinuk sugne. Kado lel,
azeekerinuk ayim abno nelle
tanem nablo kino.

Azeekerinuk muzaakarat
fanadde, wuliidhdha nacrafo.
Wuli saacat abrha yakke
waqhteh difeynih nazaakaro
nexeesebemko masalan,
wuli koonaa daqhiiqh yakke
waqhteh nacrafo. Ta araxah
lel akkinnan saacat abrhadde
umman gedda, koonaa
daqhiiqh-hi carufe naallo nelle
tane. Tayim akah abnam ayim
kinni? Aymih lee, niyanfice?
Nerhxemko lel:

Ummaan fanadde nacrufem,
amaa muzaakaradde
hammitih, yendhebeebeshih
suge mayrhabaabashit
yanfadaadago kee hufto geyo
nixatta. Moyya tucrufih,
amaa nezeekere dhibrho

cilleh tastantano tekkemko
gantah, ummaan fanadde,
missil carufe fadhdha. Amaa
nacrufe waqhte, fertoh
aymidde hamminnih naninom
nanqaamato gantah, dhicna.
Biili rimiida tenfedeedegih,
biili nabselle cilleh yadaadaw
kee cusub xayla geynih
nazaakaro nekkemko
gantah, amaa adde nacrufe
waqhtedde, wuli sissik nabsi
xumuuka abno nelle tane.
Azeekerinuk ninemko, amalle
nukummusemko laakin, nabsi
yakummusih, xangal gantah,
yagrube. Azeekerinnanim
nezeekeremih lel, walaah
inkim yabbarho mirhiica.
Amaa gedda lel, azeekerinuk
fanadde nacrafo, acrufinuk
lel, sissik nabsi xumuuka
abno, muzaakaralle dimac
naallo hidhdhah.

Azeekerinuk, ummanna
naskaakattam hidhdhah,
magnum farhshishsham hido
xanka akko nabbarho. Sik
nerhxih unkoh niqhreeyaako,
unkoh nabbarho
nicikkinemko, ummannimko
birhayno kino. Xanka akko
nibbirhemko laakin, ayim
abnak naninom kee aymih
abnak naninom neerhegihi,
biyashshiitinnan waqhte, amaa
xankalle gaxnih, nastantano
dhicna. Xanka hinam
makko malemhi sabbatah
amaydo, azeekerinnan
dhibrho, xanka akko
nibbirhihi, muluu dhibrho,
amaa xankah santishimnak
nazaakaro nacakkano.
Xankadde hammitaanam,

suura yabbarhoona kee
amaa azeekeri yaniinimko,
farhshishsha farto
yabbarhoona gantah, xiyaw
xatta. Akkinnan dhibrho
xanka hido lel farhshishsha
farto lel, ummanti ishiishi
araxah kiyah, akah yabbirhin
hido akah tamidhdhige,
mudhdhug kin arax male.
Amaa gedda lel, ninni ayqari
kee ankalaalabah kino abnam.

Aki-ginah muzaakaradde
nixattamko lel, fasledde
adrusinuk, missil arure
(noot) beynam kinni.
Amayim lel muzaakarat
waqhte, fertoh nayfiddinihi,
nayrukute. Fasledde mudarris
sharxe biyashshinnih, usuk
arhxinnanim kee abinnanim
xitta xittah naktaboo yaanam
laakin makin. Mudarris
ashruxuk, farhshishsha
farto hido naba kalimam
hido lel suurar naktabo
dhicnemko gantah dhicta.
Wulim siileh, giraafah
hido kartah gantah, abno
dhicna. Sarrah care nadiye
waqhte laakin, ninnuulah
hido ninni zoobaalih gaxnih
nayfaddano kee nayrakato
nelle tane. Fasledde noot
hido arure yaktubiinim
erherh meceerherhihi, amaa
darsedde hammiitoona kee
cundugulko xiyaw naggossa.
Sarrah muzaakarat waqhte
adde hamminno linomhi
santo gantah, noh takke.
Noot aktubinuk, kalimat
ayshadhdharh namneefecem,
waqhte beyinnixinuk, urhurh
waqtelle magnum naktabo

nitanfice. Biyashshinnamko hido macna akko nok tamlalakkemko laakin, waqhte beyinnixinuk gabbacno kee ninni addadde orbishno nacakkano. Fasledde esseror esserno, filcitti zate kee fasli angolla gantah, meceetih abo. Tayimko geyna macluumat, uyshudhdhurh ishnih nuktubeyaako lel awwaalitim balik, carelle meceetih gabbacno. Tayim lel feere xunsus kee hamminnanah nitanfice. Amaa fasledde nuktube noot yakko mudarris fidinuk niyuskutubem, carelle, ninni xasaabah lekkin naktabo. Amayim cusubih naktubem ayim nitanfice? nerhxemko lel, amaa fasledde noobbem, cilleh nistintinih, nassafaddano kee nassarakkato nixatta. Akkinnan xissadde nudrusem nelle bukaabukitinnixuk, carelle akkanih aakuminnanimih gabbacno kee nayrakato nelle tane. Taginalemih hido muzaakarah lamma daftar yabbirhiinim gantah, farhshishsham takko dhicta. Wuli daftaar nootuh, malamma lel qarcosni alle naktabo lel dhicna.

Azeekerinuk lel ninni muzaakarahi waqhtedde, umman gedda, sirii darsi cayna hido xasaabko erherhishno. Akkinnan shoqhle umman gedda, cusub xaylaalih, asriinnannimko kito erherhishsham. Muzaakara gantah amayim balik, xangal kee niya cusubi kee nabsi

gantah ishi xaylaalih anuk, asriinnannimko erherhishnih, ruhuwamalle obno. Waqhte linuk gantah, amaa siriyamko gaba kalna gedda kinni yashshem. Amay sarrah ruhuwamah daguu waqhte kee agada nirhicto takke.

Inki kalima, 100 xasaab/fikratyat irhgaako nandafishsho dhictamhi sabbatah masalan, erherhih farhshiisha kalimam nazaakaro kee nuyrukutih naarhago nacakkano. Amaa kalimam lel, akkinnan curfa hido suuradde dattowih (boldi) yekkih noh sugo dhiica, hido lel akkinnan curfahi abayshimolle, farhshiisha kalimam (giloosorih) noh sugo dhiica. Taginale kalimam azeekerinuk laakin, amaa kalima akah taneekah ninni xangaladde sigishno kee kalima balik macna bisah akko naarhago makinki nelle tanem, ta kalima, amaa curfaalih aaginale madhdhaa leyaa? Amaa curfadde tee cara kee afto ayim kinni, kee akim arhxinuk, nabaatih amaa curfat dhihrhoolih nayrhabaabasho kee teelih ayseeneynuk zirhno kinni, nelle tanem. Tayim abnemko lel amaa kalima kee tee nafaaca kee macna amaa curfa/suuradde, dherh arax noolih tadaw kee noolih marto gantah kinni.

Abayshimolle lel, inki gaba ishualah migannaacishshamhi sabbatah, azeekerinnanna nezeekeremih, ula ulah

abnemko dimac kee mawco male. Amaa gedda lel, muzaakarat filcit abinno nelle tanem, darsi maarhagohi maarhagit duhsuusan. Filci zoobit ammanginnixun, wuli adox afar yekkiinih, umman-ginah sittiyah iggidin mara, ummanimidde tastuwem, sittiyah xaaliittam kee inki caynahi luqha lem (inki caynahi niya kee farhi lem) yakkoona alle tane. Amaa filci zoobitko akkinnanti ishi zimma kee afto beyih abo kee amaa filcolle gannaaxisho lel alle tane. Akkinnanti wuli timidhdhige suura/zacab beeyaako, esseror baahak, amaa ishi zooba essera, medebbob axayuk ten yayfihime. Esseror le marah akah adabbuk lel, amaa ishi filcohi zoobitih, amaa suura, cilleh akah yayrukute. Amahe abemko, isheh gantah cilleh kinni, yafhimem kee ishaddadde orbishitam. Isheh azeekeruk kee ishi zoobit ayfihimuk lel akkinnan suura, amaa ushshukuum ishnih akah nubleekah, kafini makinki, xasaab kee fikrah kinni, abo alle tanem. Amaa muzaakarat filci urhurh waqhteh, (iggidi abayshimolle hido imtixaan waqhteh) bisah makinki, amaa darsi waqhte kaamilik yekkih, akkinnan filci ishi baxuurot xagara yaallo alle tane. Amaa filci zoobit lel akah nerhxeekah unkoh, inki caynahi niya kee muzaakarat farhi kee ugut le mara yakkoona alle tane. Xagarat baacil kee abittot mara nakko!

Ninni nabsehi kaxano

Xishmale qaari, ta majallahi 7it thabcedde, xiyawti barhi ishi nabse xishmate wayemko, garooko xishma migeyam, ishuuray kee martiinodde lel, umman gedda thaalicitak kee xazzanowak maram nublih ninino. Amayimhi cakseh lel ishi nabse xishmatati, garo gantah xishmatam kee aki maraako xishma geyam, amayim balih lel, ishi martiinodde xedeneena, ishuurayidde lel nasri wanna yakkih maram yakkeedo, nuble. Tayim, amaa tillaabe 7it thabcedde nublemhi arure tekkih, kaafit thabcedde lel:

“Ishi nabseelih salaam aallinnexe xiyawti, aki maraalih salaam yaalle yaanam, cadur kinni,” yerhxe Bertirandi Raasil.

Cindhaanedde aninuk, ninni nabse nakxinem umaabitto hido lel, uma labcad kinam nudrusih hido faw geynih nakko dhicna. Mangole doodadalle, sinni nabse yakxiniinim, adooba/hirfe balih kee aki maradde macal maltomuh tamxeesebe. Mangole doodadalle xussuuma takalel lel, ninni nabse nakxinih nekkemko, aki marah yakke kaxano mixabna hido aki marahi kaxanoh, cara manno yaanam, tashshaabbe.

Ta tillaabe iggiditidde laakin,

hammi maarhagohi maarhagit, falsaa fiyuun kee aki maarhagit, ta nabsi kaxanohi zacabah sugte mablo kalath kinam kee tanqayyaro alle tanetya kinam, sinni kutuubuh yakko madarah caddoosa sugeenih, caddoosa yanin. Ishi nabse takxinem erherh meceerherhih, aki marah darse takkem kee aki marahi kaxanoh masarrat kinam, timidhdhigih tane. Ishi nabse tikxinemko lel, ishahle kee saaxiiba takxano, mece masarrat koh yinfiddigih yane, yan macna kinni. Tayim cusub falsafa kinni. Amayim kinamhi sabbatah lel, mangole maralle, kabbaatoona alle tasreeh takke. Yakko kiyah, farhshishnanah nemeetemko, inkinnah shakkishsham makin. Amayim lel, ishi nabse takxano tantemko, ishi sacul, ishi dik (xawaz), ishahle, ishi saaxiiba, ishi xiyaw, ishi dik (baarho), isharde.... a.ra. takxano mirhictam, guddun kinamhi sabbatah kinni.

Ishi nabse kixinitoh tekkemko masalan: ishi nabse shigaara, xashiish, macaba kee aki ractemih mitaanishsha. Amaa shigaara tikkaasak, ishi nabse tikkaasa xiyawti, aki marahi agaagalle gaxih tikkaasa shigaarah, ishi zooba masxisha yanem yaarhago mirhiica. Amaa, macabah ishi nabse diihisha

xiyawti yakkeedo, ishi dik yiribbishemih, macal akyaanam male.

Cindhaanet waqhtedde, “Xiyaawinnali tik, adabeli tik, mamnanabba makkin,” yarhxe fawlih tenebih, takko dhicta. Wuliili xiyaw taginale fawuh, “Ishi nabse caazalle raacish hido ishi thabiicadde adde mimacalsiitin” tarhxe macna, akah yaxawna dhiican. Yakko kiyah, ta xussumtih tanem, rumma le xiyaawinna makin. Rumma le xiyaawinna akyaanam, ishi nabse caazalle raacishsham makin. Niyaateena yakkiinim, mecem akah akkinnexe sabab inkinnah miyane. Amayim lel, niyaateena yakkiinim, yookaayin dhamto kee mablo irarto kuxattamhi sabbatah kinni. Ishi nabse kee abte urayih niyattam lel, missilam kee xalaale kinni.

Muqhaddisiin kitoob kee coqqaal kin mudarrisiin, niyaateena makkin, kok yarhxin waqhte, mamnanabbin, yaanam kinni. Ishi nabse ikxin kok yan waqhte temnenebbih, xiyaw ilallactemko, waqhaaqhac yankallaqho kinni. Atu, ishe kitomhi sabbatah bisah, xedeneena takko laakin, kuxaqe yakko dhiica. Ishi nabse takxinem laakin, cilleh farhshishsham kinni. Amaa

kaxani laakin:

- Ishi nabse, kaamilih ikxin
- Ishi nabse, meceetih ikxin
- Ishi nabse, umman gedda ikxin
- Ishi nabse, xedenih ikxin..... yaanam takko alle tane.

“Ishi nabse cilleh tikxineh teemenemko, ishi xuggit takxano kee taamano kito,” lel yarhxe, Rabay Lebman.

Ishi nabseelih mece zamoodiino abto dhicemko, aki xiyawlih lito zamoodiini gantah, yamco dhiica. Umman xaaja lel, kunabseeko kinni erhedhdham. Ishi nabseelihi xiggaynan kuxedenisho alle tane. Aki xiyawto tekkih, ankulluqhe waytem kee ishe tekkemih lel xeden.

Wuli kasli kee furkaxateena kin xiyawti akah yerhxeekah, “ishaddah yakke, dhiica kaxano aalle waytemko, iroh (haddigih) yakke kaxani koh raaco cadur, mirhiica”. Tayim nitaybulluwem tinniyemko lel, ishi nabse kaamilik kixin mari, aki marah yakke osat kaxano gantah, yaalloona dhiicaanam kinni. Amaa ishi nabse akxininnexe mari, kaxani bakar yaallin. Tayimhi katasoh lel, sinni nabse yakxanoona, mangum yandufuliinimhi sabbatah, aki mara yakxanoona waqhte wayan. Ishi nabse kaamilik tikxinemko laakin, ishi nabsehi osah, aki mara takxano, naba caashir geyta. Ta kataytamah

lel, uskulus.

- Ishi nabse, iciyyid/xedenish
- Ishi nabselle, ishi nabseh elegga
- Atu, ishe kitomhi sabbatah, niyat

Manuweel Siwiiz, “Maale erhxemko, caggabowemih yedde yammingide” yarhxe ishi kitaabadde, ta kataytam, ishi nabse kee aki marahi kaxano kee, xishmatnanadde farhshiisha, buxtat xaqqit balik xusih yane.

1. Ishi xaal, axaasab kee dhamtot taqhiyyimem kuxaqqe kinni
2. Ishi xaalhi taqhiyim zacabah, walaah inki sabab axay waytam yakko, cafuuka essere waytam, kuxaqqe kinni.
3. Aki marahi waqhaaqhac aqhayyamti masuuliya tooqhocemko, tafrado, kuxaqqe kinni.
4. Kalathti abnan kee amaa kalathti masuuliya yaaqhuciiinimti xaqqe lito.
5. Barii takkem kee aki marahi dhamtot nagare waytamhi xaqqe lito.
6. Astuwinnexe mogti maacatot beyto, xaqqe lito.
7. Ishi axaasabti badalehi xaqqe lito.
8. “Maarhige” tarhxo, xaqqe lito.
9. “Mafhaminniyo” tarhxo, xaqqe lito.
10. “Adde yok talayem male” tarhxo gantah, xaqqe

lito.

Inki kowah tomxowwe naba mottoxowwa hido hiba tane. Amaa hiba lel, ‘atu isheh’ kito. Atu ishe kitom, maksab kinni. Atu, atu bisah kito. Aki xiyawti farheginah, kowa yakko, cadur mirhiica. Atu lel, aki xiyawto takko mirhiica. Atu, ishe tekkih, ta caalamalle tanitomuh, alxamdulillaah erhex. Yalli aki xiyawto abih kwakluqhe wayemih lel, ishaddaako kaa xamdishit.

Musussuu erhexaaki, ishi nabsek, “Anu, anu kiyomhi sabbatah, xadde hin xeden yedde yamaabbe” akkerhex. Rumma kinni, mangole waqhte, ninni nabsehi nacabi nedde yamaabbe. Ninni nabsehi kaxano adde xabna waqhti lel yane. Ninni sarsarit, betbet kee aki maxyeenimti martiino adde macal kalishna maaxi gantah, niyaseedefih yakke. Ishi nabse kixinitoh akke waytemko, ta kataya esseror iski, tadabbo icikkin.

- Xiyaw, ten mitaaminee?
- Xiyaw, kutaazaw uguttemih hido kwiilactamah, kodde yammingidee?
- Xiyaw, kuxamittamah kodde yammingidee?
- Xiyaw taasule waqhte, kolle ancaasa yaniinimih, kodde yammingidee?

Ishi nabse akah tancabo kuqasbishshamko wulim, gari akkinnan saadifille, kwayrisheenimhi sabbatah yakko dhiica. Ayraako kuddo

dhictam, mitanem naarhago nelle tane. Yakko kiyah, kolle xarhita ayarar unkoh, akah yaneekah kabbat hido intsig, yaanam makin. Amaa ayra, rumma kee cadlim kinam kee makinam, ishi nabse esseraaki, ishi nabseelih xiggaa. Amaa ayra masarrat hinam tekkemko, fidbeh tagraro ugut. Ishi nabsehi erherh dhawrheena, atu isheh maka kitom. Amaa kolle ooba ayarar, rumma kee cadlim kinam teemenemko laakin, kugilisho alle mitane. Akah yaneekah kabbattih, akko udrus. Nabaatih hugumudde raddamko kuxatamhi sabbatah lel, amaa ishi ayrisheena, casbe mikalitin. Ishi nabseelih mangaacin. Ummannim waqhte leyaam, mibiyashshiitin. Masalan: Roomaati katama inki maxadde ginniimin nexem istintin. Kuwaqhaaqahac

gantah, inki maxadde miyanfittixem iminaaki, kabbat. Xakaataako laakin, macrafin. Aki, tadabbo kolle tane esseror gantah yane. Masalan:

- Zibookiya hido zibookoliinoh, ararittaa?
- Mangole ishi waqhte, ulahaa tillaabishsham?
- Saaxiibat abnan, kollee siriyaa?
- Aki xiyawlih waanishnan, kollee siriyaa?
- Sabab akko aarhiginnixito thaalico, kodde tamaabbee?

Ishi nabseelihi wagarnan kee xiggaynan, aki dooro hin fittax kinni. Ishi nabselle risaala taktabo gantah dhicta. Ta kataytatyah iggidin risaala taktabo lel, dhicta.

“Ta yiyeseedefih yane waqhaaqhac yidumusandah,

inni gaba kee iba ibbirhih ilaalo makiyo. Aki mara hiriigo dhiica cirhe kee xaalhi erecto mayyo. Inni qadrelle gantah, aki mara xato, dhiica kiyo. Mango xiyaw yoolih inkidde tashtaqhalo fadhdhaya tane. Amaa yoolih tangalo fadhdha xiyawhi goronuh ugutemko lel, yidesso dhictamah, walaah, inkim tannaw makin...a.ra.”

Sinni nabse yakxiniinim, ummanimko ruhuu xaaja kinni. Ninneh nesketeteemko laakin, ummannimko cilisham tekkih, naararishsho dhicta. “Ta alle nanino caalamalle, kussartot safraako aganalle, kaxano kee sittiyahi faylishnan kaxano kinni tanem,” lel terhxe Maazer Tereeza

Raxeena: 2007h yinthibbice, hammi maarhago yarhxe, Mulubir-haan Habtegebriyel kitaab

Suleeman Maxammad



Nagra

Jamaal Maxammad



WASIYA

Caduuko, nimaxaarhohi jaha akko teleemhi sabbatah sarrat dhaxiine, Afambo xabeh yedee. Nanu lel amaa dik, inki andafo hinnim nexeelefe. Afambooko kude caduu sarra yabbirhiinim farhishiisha tinem takko kiyah, caduu xabe alqaamhi sabbatah, ifanihko sarra akko nabbarho mirhiicino. Caduu, nanu Dankaaliyalle erherhishne dhiba erherhille, munaawara balik yublemhi sabbatah, amalle sugtemih bisah kinni, nideeso yicikkinem. Amayek sarrah laakin, nimaxaarhi gufekkeeko, Casab 180 kiilo meter bisah kuukyinemhi sabbatah, Casab dhay waqhtedde, jabhat shacbiyaati maxaarhi gabadde saw dhiicam yeerhegeh, ifanihko Asmaraako 17 akyan kifile thoor, soomaalko lel, Dabbabaat 45 le makanyiz kifile thoor baaheh,

Bayluululle gibid difaac ginite. Amayti sabbatah, suge xayli miizaan yembedeede. Caduu cilish cusub maxaarho amaa makaanolle baahe. Nimaxaarhi laakin, istishhaad kee mudumuh naqhusehi bukadde, dherh araxah taaniyo luukyine.

Caduu baahe cusub maxaarhoh gibid difaac ginitamko bextih, utka yakkeedo abo dhiica yarhxe shakki feeremhi sabbatah, amaadambartimaxaarhabbob, caduu ugutinnexah yamattako abaasen. Amay aboona lel, Raama faanih yitxirrikeh yine barakomandooolih, Gebre Gergish Debretsiyenih santishimta inki birgeed, Habte Indiriyasah santishima lamma bathalooni, Tekhlay Isaaqhah santishima dabbaabat xayla, Bir-haane Rashaayidat rashaash xayla, Berekhet fenjih santishimta

saaruukh (faagoot) jamaaca ifanihko amaa dambar akah gufaaniikah yekke. Ta maxaarhi osa lel, suge nimaxaarhoh naba niyaa toxoyem kiitine. Amay ayeh, caduu baahe cilish maxaarhi rummah sikif ishsham kuukyine. Caduu baahe cilish mxaarhi utka abeh farraax xiyaw ishemko, wakali dhacumne kee caduu daqhtheelih 400 kiilo meter yakke mirixtaako hirgimteh, damaana le wakale gufaanam dhiicimtam kiimiyyine.

Handasat jamaaca aben ciyoh, caduu baarhodde xabeh yine alqaam yewcemhi sabbatah, Arcano kee Barcanolle yine caduu utkah mece gondo tunkhullughe. Dankaaliyat wafradde tine jabhat shacbiyaati maxaarhabbob lel, arcano, barcano kee amayko amaahe tine Baraxelle yine caduu

aymixiinim, caduu rajat gereecodde naba afto lem kinam yeemeniinimhi sabbatah, utka takko alle tane yaanamalle abaasen. Tayti abitto laakin, sirii agiirinna kee afi essertam kiiyine. Utkalamma gabooko erherhrhe. Guri gabooko 9 dabbaaba, affara rashaash keelamma faagoot kitiyah le xayli Baraxle yaatako xagara tewce. Mizgi gabooko lel, 9 dabbaaba, 6 rashaash keelamma faagoot kitiyah le xayli Arcano yaatako xagara tewce. 130 m.m. ti inki madfic, 122 mi. meterti 4 madfic, saaruukh haruurugusa inki bi-em 21 fanadde gaxeh, lamma gabo yaatako abaasen. Taginale wararah lel, Maggaabit 29, 1991hi maaxit saaca 4:30h, caduu amolle utka erhedhdhe.

Caduu sirii afi kee ishaaraxalle akki tine dhiba cursuusuto marhiicinna. Inkim suginnixuk, erherh difaacxabo yinqissibe. Baarho maxte gedda lel, dabbaaba dabbaalih dhiba katattayte. Ta dhibadde, Xasan santishak yine dabbaaba, caduu dabbaaba cidde bumbah tumuttukeh xararte. Xasan lel, yistish-hide. Amayko basolle shacbiyaati gabaako dhacameh aarhige waya caduu 5it kifile thoor, kaa dabbabaat intit siriimat idhdhalle doon akkuk yuble. Fertoh lel Baraxlelle yine 504 akyan motorayizti xayli Hararko yemeetetiya kuukyineh, ufay axayinnexe afi le dhibah xankabiteh, cabaa arhxuk

yanem macalsiite jabhat shabbiyaati maxaarhi, sarra akko yibbirhih, atixtixuk asih, kasit saaca 5:00h Arcano kee Baraxle, caduu gabaako xurredde garayte. Amaa dhibadde, inki miig, roblaani diddeh tumuttukeh radde. Anfibiyan akyan bad kee baarholle yadiye dabbabaako 8 yindhibbirhe.

Caduuko, niya akko dhumteh tine saacadde, dhiba katataytam doorimtemhi sabbatah malammit dhxiine, Maggaabit 30h nimaxaarhi Waddet gabolle ugute. Yakko kiyah, Waddet arax, vokaani rifti lillig dhayitih yemmegetiya kuukyinemhi sabbatah, nidabbaabit, saacalle 10 kiilo meterko aganalle yadaw mirhiicinna. Ta dhacuma araxadde anuk, caduu utka abemko, tasaadafo dhicta aziya ruhuutiya makim mudhdhug yakko kiyah, aki dooro mitinemhi sabbatah, ullo kee lillig volkaanooti dhayitih yemmeege arax farhe ginah abaasaanam, raacinnexam tekke. Nimaaxaarhi taginalemidde anuk caduu, 17 akyan kifile thoor Bayluulko wadde faanib baahem timidhdhige.

Jabhat shacbiyaati faslit, amaa dhacuma ullo kee lillig dhayit abaasemik sarrah, waddeh kab yerhxe. Wadde amaa tabbiime makaanonko ulah kin baarhot difdifle makaano kinni. Januub Ayrodhdhumat gabooko silansil kin xangoluh makarimtetiya, Ayrommaaxat

tee gabo lel, baddi gimam le fidin dudub letiya kinni. Caduu, waddelle 5it motorayiz birgeed 503,504 23it birgeedko lamma dabbaabat shaaleeqqa ,amay balih lel, Asmaraako yemeete 17 akyan kifile thoor, amooko 7 ibi baraagid, lamma dabbabaati shaaleeqqa, lamma batri 122ti madaafic, inki batri bi-emiyya kee faaluulko 21 yibbirheh niilaalak yine.

Magaabit 31hi maaxalle, nimaxaarhi cilish caduu maxaarholle, dhiba faake. Caduu silansil kin xangolko witix yarhxo xine. Fertoh lel caduu 17 kifile thoor, jabhat shacbiyaati maxaarrhoolih mangom dhibbayetiya kuukyinemhi sabbatah, dhacumaatih dhibbaye. Taginah adooxa maxakke afcaasin dhacuma dhiba katattayte. Tine gondo taysheeqhelem kiitinemhi sabbatah, amaa dhiba santisha yine Wuchchu, kaa gerille tine maxaarrhabbobuh deecimeh, tane dhacuma gondo lawwahto, ayim abnam tashshe akyerhxe. Yakko dhiica akyan xasaab lel baahen. Guraako nidabbaabit akko tillaabo dhiica arax yinniyemko, masangaleeko dhiba takko, xagara yeyyeecin. Amaa dambarti makaniyzi abbah yine Čayna ishi jamaacaalih abe tafaahumuh, malammit dhaxiine, affara dabbaaba kee parakomandooti bathalooni, handasa kee rashshaashah gorsiima, masangaleeko

caduulle dhiba faaken. Amaa dhibadde, Cabduraxmaan ishi zoobaalih atfeehemuk, nasre le ciyo abe. Caduu akkale waya gabooko gira alle xarhitte gedda, kudah suththac ishite. Kudak yine caduu dabbaabitko lel, cibra le seloh malxiin xarare. Eretriya kee Itobbiyaati wakaleeko caduu inkille yesketteh, abeh yine gibid difaac, tinem-tine yekke. Ta cilish dhibadde caduu, 4000 yakke maxaarho yikhsire. 500 takkem lel, yindhibbirhin. Dabbabitko 11 kee inki Zuu akyan rashaash teerreh tine makiina xararte. 4 dabbaaba kee 122 mi.meterti madaaficko 2 yinsillibe. Jabhat shacbiyaati maxaarhi gabooko, ufay axayinnexe roblaanitti dabdaabah, lamma marçedis xararte. Makanayizidde dabbaaba taamiremko, Yonaas Tecaggges kee Mel-akke Belay mudduten. Xayli fantisheenah yine Mexaari Fermi 40 mi.meterti rashaash tooqhoceh tine masxitte makiina aymaacuk, ishe kee obboreeterih roblaanooti dabdaabah yistish-hide.

Fermi, Fenqil abittooko sarrah ishi numaalih urhur waqhteh geytimo dhiiceh yine. Amaa maxadde kaako waaris akah yakketiya raacishshem, jawaabah akah warishshe gedda, labtiya yekkemko Fenqil akkerhex. Saytiya tekkemko laakin, isheh farhinnan migac akah eyyec akyerhxe Fermi. Anu laakin...? Kaa waani

cibra akah tekkeh, ihii atu? Terhxeh kaa esserte gedda, dhibah adiyuk aniyomhi sabbatah, gaxam makkale akyerhxem, kaa xalaalento daalishsha. Akah yerhxeekah, kaako garbadde raace zabuli yaabukem kee usuk yastish-hidem inketta tekke. Maggaabit 27h yooboke zabulak lel, abbat amaanah, Fenqil akyerhxin. 25 iggidiyahi gufa yekkeh yane.

Amayek sarrah, Bayluululle gazah gaxne. Silliya kee handasa aba baxuuruse idhdho kee agargarak sarrah, Jabhat Shacbiyahi maxaarhi katayto le utkah ugute. Nidabbaabit dherhikkeeko Gaxarre fanah, amakkeeko lel, Derrib gabolle aduuk, sanitisha tine dabbaaba, Derrib songohi xeewin araxadde, alqaamah tumuttuke. Kataa yine maxaarhi arax wayemhi sabbatah, Gaxarre faanah gaxeh, yucrufeh aso yinqissibe.

Amay duhte caduu maxaarhi abbob, raace maxaarho yeskekettiinih, lamma ibi bargeed kee 6 dabbaabaalih, roblaanitti cilish dabdaabah gorsiima, dhiba faaken. Futstsum Gebrehiwwet kee Tekheste hayleh sanitishima niparakomando laakin, dhiba faake caduu yiymixiih, gazi gabolle meceetih tarishe. Amaa dhibadde nigabooko cindedde tindhibbirheh tine inki marçedis roblaani dabdaabah xararte. Dabbaabat jamaacaako lel, Adxanom Hayle yistish-hide. Roblaani

dabdaabah mangole waqhte waqhaaqhacittam, gacazi jamaaca kinon. Amaa maxade asse dhacuma gondooko laakin, sirii hurtaake kee juhdeh akko taboona dhiicen.

Handasat jamaaca, amaa caduu baarhodde yoocore alqaam askatti aseanimik sarrah, malammit dhaxiine Maggaabit 4, 1991h, gerho Bayluul gabolle tekke. Cabduraxmaan lel, Bayluul gabolle gerhoh ugutaanamko basolle, isheh santisha dabbaabat xaylakke, “Bayluul naatako kino. Maxaari G/hannis (Fermi) yistish-hideh yane. Mitamidhdhige, anu gantah ta dhibadde astash-hado dhiicamhi sabbatah, yisarrah Tesfamaryam Pawlos (Xaliibay) sin masuul yakko kinni. Sinni baso balih agiira tika” akyerhxe.

Badti gimamalle geytima Bayluul, aki Dankaalialle geytime waya sirii Cungat garabah agoogite dik kinni. Ayrodhdhumat gabooko makareh yane silansil kin xangol, amaa dudubulle yane dikih, cirhe akah yaxay. Dhibat waqhte laakin, yaatuke xaylah, mango garab le makaano waqhaaqhac kinni. Yakko kiyah, caduu niyaako radeh yinemhi sabbatah, amaa tine doorolle yamnaafaco dhiicam kuukmiyine. Tillaabe waqhtedde yekke mango dhibabadde, rabaa, mudum kee tindhibbirhemko raace 17 akyan kifle thoor, Bayluuludde akko oroban codhdhole Cungat

garab le gadi gimamalle, maglelliiminnixuk niyaako radeh, tawlalle gaza le akkayinnixon iyyir utka erherhishe. Wuli yisbiyeh suge arbejjiiti madfacajji caduuya lel, Cabdurraamaan gabolle bumba cide. Amaa bumba adde assemhi sabbatah, bahar Cabdurraamaan, akkainih yistish-hide. Kaalih suge Tedros Fissahaye yakkeedo, yistish-hide.

Cabdurraamaan 1956h Nuur-xuseen Maxammad akyan abba kee Baxro Axmaddiin akyan inaako, Sancafelle yooboke. 7it fasle fanah lel, Sancafelle yudruse. 19 iggidiyahi gombo yekke gedda lel, 1975h Addisaaba yedee. Amakkeeko Soomaal, Soomaalko lel Yaman tabe. Yamanko leel meedaan oobeh, Jabhat Shacbiyadde yengele. Cabdurraamaan tacliimide, tatecillimemhi xaylabba yekke wuliidhdha yukhdumemik sarrah, naba aslaxahi xakadde, yinqiyyire. Urhurh waqhte cilish aslaxahi jamaacaalih kalemik sarrah lel, gacazi xakadde yinqiyyire. Amakkedde lel mudda yukhdume. 6it beelayhi erhedhdhodde lel amaa adde yine cilish aslaxahi xakadde dabbaabat sawwaag yekke. Urhurh waqtelle lel filci abba yekke. Luukyine lillaage kee hurtaake tumbulluwah, inkim sugekkah xayli fantooseena yekke. Cabdurraamaan ummantiyaalih xan kee lay kuukyinemhi sabbatah, kaa zoobahi qalbedde,

sirii hababa luukyine. Lillig hammih wanna kee kataabinnat dhic kee irhga le alay xiyawto kuukyine. Usuk guddacsimeena kee makkot wanna, nabaatih lel, ishi selimalle raba bahar kuukyine.

Cabdurraamaan istish-haad, kaa zoobah, naba kasaara kuuyine. Kaa istish-haadah xazzanoye kaa zoobi laakin, amaa katayte dhibadde, feere nix kitiyah abiteenih, ummanille niyaako radeh farraax yerhxih yine caduu, ibi maxaarhoolih yekkiinih, aqhirrimi Bayluuludde oroben. Bayluuluk sarrah katayta niselima, Casaba kiitine. Amay kinamhi sabbatah lel, caduu gabadde akko ractih tane inki mina, lemko takkannah, Jabhat Shacbiyaako deeso dhiicam, ilaalimtam kiitine. (Ispartaakiyad—macnaaha, inketti tamantidhdha) migacah le siriyam adde yakkale maxaarho ifanihko baaheh lel, Casaballe gibil mazgabo abe. Ispartaakiyad Casab baahemik sarrah, Maggaabit 8h baradde, Jabhat Shacbiyaati maxaarholle, dhiba faake. Sirii dhibak sarrah Jabhat Shacbiyaati maxaarhi, diddi utka abih, lamma dabbaaba akko xararishih, amaa akko ugutelle kaa yedebbe. Malammit dhaxiine, ufay xeewantih roblaani dabdaab abak ase. Badaleh laakin baaho dhiicem male. Amaa dabdaab abak yine roblaanitko, inki

helikobter roblaanitti didde kin nijamaacah tumuttukeh radde. Amaa maaxit dabdaabadde lel lamma caskarti nok yistishhide.

Amayek sarrah nimaxaarhi, Maaziyat 15, 1991h caduulle dhiba faake. Yakko kiyah, caduu istraatejjiiti makon yibbirheh yinqirribeheh sugemhi sabbatah, amaa maaxit utka salaaxa maabitinna. Caduu gibil mazaagibko nayyaaco mirhiicino bisah makinki, nabaatih malmimih diddi utka abih, amaa nibbirheh ninino wuliili makonko nidufuwe. Sugusuh geye nasreh aydukumumeh, Asmaraako 21 akyan kifle thoor ifanihko baaheh, Maaziyat 25ti maaxi baradde, sirii dhiba nelle faake. Ta dhacuma dhibadde bar kee lellecih yakke roblaani dabdaab adde ossiteh, Bayluul hadig tarhxe makaadolle yimbiddile. Andharhuk yine cimir Cungat garab, doon yekke.

Caduu roblaanitti selima kiitinem, leddeeko caduulle rima gamak yine nimadaafic kuuyine. Nimadaaficti jamaacaako roblaanitti dabdaabah, Xaliima Cali kee Soofiya Tewelde adde geytiman adoox nok yistish-hidin. Inketti lel muddute. 122 m. meterti inki madfic lel xarare. Dhacuma harur, safra kee bakharlih akki tine sirii dhiba, 4 maxakke katattayte. Nicaskar xaakok lel, istish-haad kee mudumuh daggowte. “Igrira” yaanam temeetemhi sabbatah laakin,

inki caskarti 10ti idhdha yekkeh, mulluuxeh addalle nok sayeh yine kifile thoor 22, Bayluul cindedde yumbukkuneh raace. Taymih xankabite caduu, abyshimot ufay xeewantiiti cakanah, 21 akyan kifile thoor Asmaraako baaheh, Gimbot 3h badti gimamko Bayluludde akah orobaakah akkabe. Orobe maxaarhi lel, “Lay akko ibbirheh aniyo. Amay balih lel, saamiyel akyan xaakimti, lamma ishaamoh ibbirheh aniyo” tarhxe nasri farto, ishi naba maralle tillaabishe. Tindhibbirhe, Saamiyel adde yane caskar lamma, caduuko raacishoona nijamaaca zatedde ani laakin, Saamiyel Casab orobem tomoobbe.

Insire arhxuk yine 21 akyan kifile thoor dhibah akkituuk kasissiyolle niparakomandooti xaakok makanayizih gorsiima, amaa nasreh fikkilitak yine kifile thoorulle, dhiba faaken. Amaa dhibadde caskar dhic wac yerhxih yumbulluwe. Caduu lel farraax yerhxe. Dabbaabatti silansilih, caduu sirii-ginah yimiccite. Amaa kifile thoor jamaacaako mango mari, amaa Bayluul cindedde raacen. Daguu mari lel, amaa akko ugutenille gaxen. Amaa fakkitte dhiba nicaskar-hi nasreh gommimto kiyah, Jabhat Shacbiyaati maxaarhi mangum yunquse. Amayimlih sirii harur le waqhte kuukyinemhi sabbatah, sakay kee kitiyat dag-na takmalo, waqhte fadhdham

kiitineh, Jabhat Shacbiyaati maxaarhi abbob, gazi gabolle tarishaanam hidhdhah, amaa gufen makaano yisgibidiinih, caduu xaraka xeelah waacinsitaanam dooren. Amayimti agaagalle, caduu huf ishinnaxamhi goronudde yinin. Abayshimolle inki xulka yukhlughin. Makaayin baradde lučči iffooseh difaac akah orobaakah, gaxah laakin, lučči badisho lel, amre tillaabishen. Caduu, sirii maxaarhi difaac sayem yekkeleh, sirii-ginah gilixe. Malammit dhaxiine lel, roblaani ifaarishe. Bar munaawara abeh, nimakaayinko inketta tumuttuke.

Dankaaliyat gondo taginah ani, Jabhat Shacbiyaati naba mari, caduu cumre tayshudhdhurhe taro Deqqimaxaari dambarko takko, abaysho tillaabisheenim caddossa sirri farto, dankaaliyat afayitille tine maxaarhi abbob gufte. Adooxa alsakke ayrikiinnexa Dankaaliyat afayitille tekke dhiba, caduu sirii-ginah sikif ishishshemhi sabbatah, daddagumuh xayla naba dambarko hiriigo, kaa qasbisheshe. Ta araxah lel, Dankaaliyat wafri, abayshimot utkah mece gondo tunkhulluqhe.

Gimbot 19, 1991h Deqqimaxaari dambarko caduulle fidin utka erherhdhe. Deqqimaxaari dambar lel dume. Gimbot 20, 1991h lel Deqqimaxaari sawrat gabadde

gaxte. “Hatsee Tedros balih inni musaddas aacabo kiyo” ayyuk yine coloneel Mangustu Hayle-maryaam, ishi reeza Tesfay Gebrekidaanalle yistilimeh, Zumbaabe kude. Jabhat Shacbiyaati maxaarhi, caduuko ractem aqirrimuk, Gimbot 24, 1991h Asmara orobe. Casabko bextih, migele Eretriya, xurredde garayte. Asmarat dhibrhi tamaa sirii harur, safra kee bakhar currusuuteh migele adooxa alsakke, ufay xiyawalle axayinnexe dhibadde dhibbaak, 700 kiilo meteeryat afayitko tabeh, Casab ifee gufeh yine nicaskarah, ferta niya taxayem kuukyine.

Jabhat Shacbiyaati maxaarhi, amaa akki tine dhacuma dhiba curo taaneh yine Dargi maxaarhi, amoytah luukyine Mangustu Hayle-maryaam kudemik sarrah, nabaatih niyaako rade. Amayek sarrah dhibbaw kinni yaanam, tamxeesebem kiimitine. Ishaamo kee ishi aslaxa ullelle afah hayeh, Casab gabolle kuda erherhishe.

Eretriyahi agiira laakin, makaayin kee dabbaabitakke gaxeh, kudak yine caduudde katayak, kaa aslibuk, nicaskar aasuli, caduu laakin weeca, Casab gabolle yedeyin. Gimbot 27, 1991h lel, Jabhat Shacbiyaati maxaarhi Casab orobe. Migele Eretriya lel, bad kee baarhoh, xurriyadde garayte. Istimaar cumri lel, Casaballe yikhtime.

Nasri nummatah!

Mihra kee Uray

Suleeman Maxammad

Mahandis Maxmud Maxammad-Saciid

*Tookomih, ishi nabseelih
nitashsharhaarhago*

Maxmud Maxammad-Saciid yokyan. 1995h Caddi-qhayyix Cindha zoobaako, Igiili wakali asxadaadaralle geytima Cado-lay akyan dikille ooboke. Wayyaanet beelayhi waqhte, ninni dikko nicrhiih, Kaaribossa nedee. Amay sarrah, Caddi-qhayyix orobne. 2003h Sancafe nedeyih, kado Mansuura akyan dikille ninino. Mansuura, Thiishaako, Sancafe gabolle takko kiyah, Caddi-qhayyix cindha zooba kee Igiili wakali asxadaadaradde yane dik kinni. Inni barmaleelih lel, umbakale irri tillanbisha waqtehg iggidin waghte tillaabishe.

*Cindhitik ayim takko
abhigituk tinito? Ishi buhge
geyto lee, aaginle dufla abte?*

Cindhiyuk, daktoor
akko bahge liyuk iniyo.

Amayim inni dikko
oobbem takko dhicta.
Yixattam migeyinniyo
kiyah, bishkilettat
mammakaakama akko
gantah, farhi liyuk iniyo.

*Darsi kugerho
(Eerhedhdhot daraja,
fanti daraja, malammit,
daraja) arhxitik aagana
kinni?*

Erhedhdhot darajaako, 1ti
fasle kee 2it fasle, Caddi-
ghayyix erhedhdhot darajahi
(askoola xabashshah)
tamidhdhige madrasadde
abe. 3-5 fanah yine faslit,
Sancafelle, Fishshot
erhedhdhot darajahi
madrasadde, fanti daraja
kee malammit darajaako
masaggalit fasle, fanta
kee malammit darajahi
Matharat madrasadde
udruse, 10na kee 11ya
faslit lel, Soytrat malammit
darajahi madrasadde abeyaako



lel, 2014h Saawa oobe.

*Darse aaginah kito
erherhishshem? Ishiinahi
luqhahaa woole...?*

Erhedhdhooko, Tigriinyat
madrasadde kiyo orobem.

*Aymihi, ishiinahi luqhah
erherhishe waytem?*

Yidik-hi dufuwo kinni,
akkarhxo dhiica.

*Aaginah akko towcee?
Malammit luqha kolle
masrayinnaa?*

Wuli lamma alsah, ‘amo’,
‘aduu’ yokkarhxi kiyo,
adrusiyuk iniyom. Inkim
dhiicak miiniyo.

Aaginah dhictee bisah?

Aabbinnanna xangaladde
abbirhiyuk kiyo, udrusem.
afti faslehi malammit
semesteridde, ummando mece
mawco baahe. Yimudarrisiin,
taginale nabinta yokko bexsiita
kee fertoh yaydukumusa
yedeyin. Afti fasledde,
malammah owce. Tigriinyat
luqhalle raacinnixuk, mece
nuqhtha iysijjile.

*Tigriinyat luqha, awlih fasle
gufte waqhte timlike?*

Afti fasleeko ferih,
malammit fasledde, atfaahamo
dhiice. Malammit fasledde lel,
luqhat gabooko walaah inki
cuzre liyuk miiniyo.

*Aaginale arux kee xeela
temneefecih kito, malammit
luqha tamlako kee darselle
tanfacio dhictem?*

Yisoxoba erhedhdhooko,
Tigriinyat luqhahi
waanishseenit kiiyinin. Tenlih,
xoolashshitinnixiyuk, fidbeh
waanishak iniyo. Akkinnan
luqha fidbeh waanishaanam
wuli arax kinni. Farhi kee ugut
yaalliinim lel aki arax kinni.

IQ aaginaa?

Amayim magnum
maarihige laakin, wulim adde
miwaytimta. Amaa daktoor
Amiine Tekhlay ishi garaadde
akah yerhxeekah yakko yane.

Darselle aagina kituk tinito?

Bukaako, afti fasleeko
aykee 11ya fasle dhagan
ashshowa beyak, 8ko aykee
11ya fasle dhagan lel fertoh,
inni fasleeko bisah makink,
amaa adde iniyo madrasadde
geytima yidarajahi faslitko
gantah erhedhdhoh (yunitih)
awciyuk abayshe.

*Ummanimko aganalle win
kodde tarhxe darsi cayna,
awlihtiya kiitine?*

Erhedhdhot darajadde, Loo
kee Ingiliiz luqhalle kinni,
yixayli kuukyinem. Fanti
darajaako amulalle, Loo
kee Fiizikis akxiniyuk edee.
Amay sarrah lel, umbakale
darsi caynan macalsiitak kee
fertoh adde hammiitak edee.
Ammakaakakam yanemhi
sabbatah kee maatrikille mece
mawco bahto tekkemko lel,
umbakale darsi cayna unkoh
takxano kee adde hammitto
kinni, kolle tanem.

*Fertoh akxinituk kee
assokootituk tinito mudarris*

teellemko?

Makawwanit fasledde
Ingiliiz naydurusuk yine
istaaz, agiira kin darasa
fasleeko faslelle hel ishishak
akah nayduruseekah
nokkobak yine.

Atin lee ayim abtan tiniini?

Bar-malet aydaras balik
kinni. Ninneh naarhigem,
ninni xeela kee araxah, ninni
zooba akah nayduruseekah
kinni, nokkabak yinem. Tayim
lel nowah gantah, ferta niya
kee aydukuma noh akluqhi
tine.

*Kudik, lamma-gale kee
mudarrisiinko, aaginale
aydukuma koh akki tine?*

Iggidin abayshimolle
ashshowa beyo liyom
mudhdhug kinamhi sabbatah,
ciid balik kiyo, ilaalak iniyom.
Cusub sartim saritih lel, inni
soxobaalih xedenak iniyo.
Erhedhdhot darajaako, fanti
darajadde tillaabak masalan,
bishkiletta yoh dhammimte.
Fertoh aydukumumih lel, niya
ikkitiye. Bexsoh koh yakko,
amaa bishkilettalle, kazzik
alle amneefeciyuk aniyo.

*Cindhamasot ayqariridde
angalituk tinitom, oobbih
aniyo. Aaginaa?*

Yoo, meceetih tanito.
Malxinko aganalle, darsedde
midoh 10 anah tane darasa,
aglet zooba yakkoona yaanam
tinemhi sabbatah adde say
shoqhle kinni. Nimadrasahi
nabatiyah yine, istaaz
Kufloom, migac yokkaarhiguk

yinemhi sabbatah, abbat migac yok essereyaako, isheh kinni, yiyuktubem. Anu, aglet irhga magnum liyuk miiniyo. Amo xukuukak, “Istaaz, anu margadisho mirhiica”, akkarhxiyuk astintine. Amaa waqhte, ECDA (Eretriyat Cindhamaso kee Darasahi Ardeeyin Aglehi) ayqarir unkoh, cayda margadde bisah kiyo, akkaliyuk iniyom. ‘Ximmeret’ akyaanamhi darse abe. ‘Fenqil ximmeret’ akyan filcohi nabatiya ekkih doorime. Amaa waqhteeko lel, mudhdhug kin aglet zoobatto eke, yan macna lel kinni.

Cindhamaso kee darasat agle, aaginah geyte? Amaa ‘ximmeretidde’ lee, ayim tudrusiini?

Amaa liyuk iniyo misleelih, inkinnah sittiya geytam makin. Amaa anu akkaliyuk iniyo cayda, inki xak amaa agletya bisah kinni. Xadde hin kileeba tine. Ishiishi farhi kee dooro balik lel adde sayta. Qiraa-at kileb, meediya, caafiyat, cijaajinna, asannaf kee asannac, indhirhi kileb...a.ra tine. Anu lel fertoh, qaariyuun kilebidde ayqaritak iniyo. Meediya (geyshisheenitko) lel fertoh, Saahot barnaamijidde angaliyuk iniyo.

Amaa raadiyootimille alle gaxno kinokii, ‘ximmeretidde’ ayim tudrusiini? Xunsuusuttamko yihaasawishsho. Aaginah lee, geyte?

Mamalxanit fasledde aniyuk kiyo erherhishem. Cilleh lel



mecem kuukyine. Axaasab/fikrat ayfaddan, qhamatat caddosnan, bukaakohi war-hado hido idhdhaaget aynobiya, geyinnanimidde ishe tidminih tangelo, xiyawlih tirir zamoodiino taallo kee...a.rah cilleh mece.

ECDAAh yanqirribe cindhamasot raadiyohi Saahot barnaamijidde gantah, ishi farhih angalituk tinito. Tayim kumartiinodde aaginale wahas liitine?

Ta shoqhle, masaggalit shoqhledde aniyuk kiyo erherhishem. Maynafxille kaadir nudrusih gaxne waqhte, ishi farhih aba mara? Tarhxe essero temetih, Faraj kee Maxammad-amaanlih erherhishne. 14 xiyawtiya le kilebille gantah, tenebih tine.

Shoqhli aaginah yine?

Mangih, cindhamaso tablem kee tawikkilem kuukyine. Siyaasa, jamce, cayda, darse... table barnaamiija kabishnak

ninino. Saahot luqhahi cadar, furkaxat, missilit...iggidin, waqhte tillaabish kee darse galeeliite barnaamiija gantah, kabishnak ninino.

Aaginale mablol kee aydukuma lee, geytan tinitini?

Cilleh aydukumussam kiitine. Nimudarrisiin gantah andhaxsiiteenih, mablol noh axay yinin. Amaa shoqhli, ishi winah abtam yakko kiyah, amadde saytam isheh, wuli naba xaajah ambulluwi tine. Mango mari lel, amaa raadiyot barnaamijti zooba yakkiinim farha yinin. Dhiicimemko, kado gantah amaaginah katattayto kiyo amaanatisham.

Amaa shoqhle kee farhi kattayteenim takkalee?

Sancafeeko Asmara yedeynih yamagiinim racte waqhte, amaa farhi gantah amalle soolte. Saawa, amakkeeko lel, kulliyat gerho katayte.

Saawi ishi zikriyaako...?

Ardi mahrajaan kee cindhamasot shoqhleh, ookomih Saawa gufih iniyo. Darasatto ekkih tee gufo lel, abhigiyuk iniyo. 2014h, 28 yarhxe doorlih kiyo lel, Saawa oobem. Saawi martiino kee nabra lel unkoh xunsuusumtam kinni. Tee xunsus, baasko ob akah terhxeekeh, xiyaw mangaalih, akkeeko awlalle kiyo? Miyaalih? Allee? Arhxitik, ufay kodde yaxeeewe. Yakko kiyah taymidde, daqhaayiqh gantah, adde mikalta. Ummanti ishi masricko kifile seraawit fanah, daqhaayiqhti addadde kinni, ishiishi cara yabbirhem.

Saawalle fertoh xunsuusuttamko...?

Saawalle takattem, ummaan baarhooko, umman caynahi xiyaw kinni. Barri mara, madiinat mara, shoqhle dhictam hido shoqhli labcad lem kee hinam, sagala qhoomiyaako.... Sarrah laakin, mango caynahi asbeeza inki inxedde tesgeegelleyaako, baskaako basak yarhxe teker betto balik kinni. Xiyawti barhahi thabiica, waqhteelih daddagumuh tanqiyyirem kino, cilmedde gentah nadrussem. Saawi cilmi laakin, amaaginah makin. Mango caynahi muytuutuulih temeete mango caynahi xiyaw Saawalle, inki xiyawtohi thabiicalle taararo, alsa gantah mifadhdha.

Saawi farhshishnan cindhamasot afaadadalle,

aaginah table? Wulim nok tarhxo.

Amaa ushshukuum ishih akah kokkerhxeekeh kinni. Saawi, ishuulahi arde (wathan) kinni. Saawa gufitemko, migele Eretriaako gufinnixiyokke yok racte akah tarhxemih inkim malto. Saawalle, adabe, aglet martiino, waqhti missil amnaafac, doodadti cayda kee xishmamti irhgah ginnimta. Nabaatih lel, ummantiya kee ummanna dhiicatya tekkih kito tawcem Saawaako.

Kulliyadde, aaginah orobte?

Saawalle 12ya fasle abayshih, maatrikidde engeleyaako, 3.8 baahe. Maynafxi kulliyadde lel orobe. Erherh iggida abayshemik sarrah, handasat cawdadde engele.

Kudooro kiitine woole, aaginah adde orobtemii?

Yoo, yidooro kiitine. Inni cindhiinat waqhtedde kiyo, doktor, payroll arhxiyuk iniyom kiyah, enebek sarrah, inni darsi cawda, cilleh kiyo eshsheerhehegem. Amaa geyih iniyo nuqhtha laakin, xikkiminnat cawdadde gantah, yorbishshatya kiitine.

Ishi darsi zoobaalih lituk tinito zamoodiino kee madhdhay, aagina kuukyine?

Ummanimille, meceetih yine akkarhxo dhiica. Saawa malee kulliyadde, xadde hin inkiddehi shoqhli kuyaseedefemhi sabbatah, astuwituk kee sittiya xattak

kito tashtuqhulem. Inkidde shoqhli, cilisham yaysissike. Xattishimnan adde mangomhi sabbatah, daqhte kee tacabko nagaa takke. Huftoolih kito abittam. Waqhti urhaarhe kee tantooko lel naggoyta. Umman-umman ginah farhshishsham kee katattayto missilam kinni.

Abayshimolle kabishshen idhdhot waraqhat, aaginah dorteeni? Aaginale mawco lee, luukyine / alle geyteeni?

Eri-9 building (9 doorle gino yaanam kinni). Eri-9, 9 qhoomiya tawikkilemih kino, nexeseebem. Amaa gino gantah, maczooko nable waqhte, 9 misle taallo kino, xagaradde haynem. Amaa gino, Eekispolle abno kino lel nixiggirem.

Eekispo akah dorten sabab aymi?

Ardi mahrajaan alle yakke makaano hido dagge kinam hidhdhalle, Eretriyuun unkoh kinon, alle yakattiinim. Amayim kinni hanuk laakin, nabam kee waqhti baahot carwa alle dago. Mahrajaan karmadde yakkemhi sabbatah, rob yane, kalla tane, munaasibiino male, shuqhoqhti dag-na tane. Xiyaw digira kee waqhte tillabsiita kassoytih, adde dhinta hoteela male. Amaa gedda lel, umbakale taymidde xatto, amaa mahrajaanah lel cizze takko ginohi ginnanah kino, ugunnem.

Amaa waqhte, ayim abteeni?

Baarholle (gubi doorulle) dokkon teellih, kataya dooraalle lel, mayballaytinat reedit, caydaatim kee waqhti baahot macaashat carwa, waqhte tillaabish fantat, makaatib, hoteela ...a.ra galeeliite barhsimte gino takko kio, nixiggirem.

Amaymidde lee, aaginale salaaxa adde geyteeni?

Cilleh mece mawco adde geyne. Adooxinuk, muluu nuqhtha (A) alle geyne.

Kado aagondo akko litiini?

Amaa shoqhli obsiimih caralle yane. Koronat sabbatah bakhte migeyinna, obsiimih yane. Eekispolle, ardi mahrajaanalle kabishno, xagara linuk ninino. Ummanna tay sarrah kinni.

Amaa shoqhledde mii koolih yine?

Samsoon, Semere kee Kamaal Axmaddiin yoolih yinin.

Darrsek sarrah, shoqhli caalam aaginah koolih yane?

Erherhih, medderokee zarahi korporeshinidde kiyo, shoqhle erherhishem. Amadde, wuli koonaa alsa ushtuqhule. Koronak sarrah, unkoh Tacliim Nabareenadde tabne. Kado amaa awwalah adde udruse, Sancafi madiinalle geytimta, Soytrat malammit darajahi madrasalle, mudarris ekkih alle gaxih aniyo. Amaa yiyuyduruse maraalih lel, ten shoqhli zoobayto ekkih,

ashtuqhuliyuk aniyo.

Aydaras aaginah geyteehee?

Cilleh naba zimma yashshuqhuce shoqhle kinni. Amaa nayduruse mari, amaa isheh guftih tanito daraja hido amayimko xaf yarhxoonaa kito, akko fadhdham. Tanto hido macalwayto tublemko, kodde yassaabbe. Agiira table waqhte lel, xedenta. Koh yanfacoonaa lel, magnum tandufule.

Mudarris afto darasatti ginodde, aaginah tashrixe? Mudarris bukaako lee, aymotta kinni?

Aydaras, ruhuu mihra makin. Xiyawto ginaanam, cilish shoqhle kinni. Sabre tathlibem lel kinni. Mudarris afto taymidde lel, cilleh nabatya kinni. Darasatti mangole waqhte, ishi mudarrisih kinni yammingidem. Mudarris, darse/cilme bisah makin yaydurusem. Adabe yayrhibirhe, faysha, yaywijjihe, jaha yayrhibirhe, qamata akah yaalliiniikah aba, niirohi martiinoh lel, mece balima yakke. Tayim lel, afah hido waanih bisah makinki, isheh ummanimidde misaal akkuk takkem kinni. Amayim kinamhi sabbatah lel mudarris, ardentit gina, misaal/mubul yakke, doodat marax kinni, arhxoo dhiica.

Ta arhxituk sugtemhi xaddelle, mudarrisiin niya, aaginah caddoose dhaarihito?

Yibbirhiinih yanin shoqhli, naba zimma yayshshuqhuce

shoqhle kinam afhiminnexe mari yanemih iggida. Wuliili mudarrisiinille, maxda kee martiinoolih yendhebeebeshe dhamtot koh yambulluwe. Ishi shoqhleeko aganalle, osat shoqhle kee soldit goronudde hammiita mari yannaw dhiica. Bukaako laakin, nagaa kin niya tane.

Amaa tudruse cawda (handasat) shoqhlehi aynobiyah, ishi buxtah abta dufla tinniyemko?

Amaa udruse cawdalle gaax arhxeh ableh kiyo. Wuli dago viidiyo gantah katattaya. Muhandisiin geyemko lel shoqhli kibra akko beya. Macalkalisho kee baddaahisho yelle mitanem aarhige.

Aki-ginah gantah, cibbat zagaxat aftax yable waraqhat ishi zoobaalih kabishsheya yine. Eretriyat qoomiyaatliah ayrhebeebeshituk, kaa dhibrho iski uyshudhdhuurh noh caddossa.

Januub zooballe ECDAAh maglelliime asxadaadar kee santishnan darse beyne waqhte kabishne waraqhat kinni. Kaa dhibrho lel, umbakale Eretriyahi qoomiyamalle yambulluwe zagaxax kee kaa cibbat aftax tablem kuukyine. Lammalle xaznih lel nuble. Amayim lel:

1. Sugti qaanunudde cikkishite aftax kee

2. Lasoo-las, zanta kee massenedde cikkishite aftax kinni.

Lasoo-lasalle xalle balik

makinki, erherhidde, fahaamat aynobiyah kinni alle yamshuqqulem.

Saahootimidde fertoh hamminno. cibba kee zagaxat aftax aaginale madhdhaa leyaa? Kaa dimac lee aaginaa?

Umbakale qoomiyam balik Saaho gantah, ishi aftaxi arax leya. Lamma xiyawtohi fanalle gica teseedefemko masalan, amaa gica lel gidfo hido biili xarhnan guftemko, amaa aftaxi araxalle erherhih, amaa yootoketiyahi ahli hido dik, 'Cawi' akyan, baska ke subaxah iggidin xaaja yibbirhih amaa yumuttuketya gufa. Tayim erherh daraja tekkih, xankabto kee naxrurtaako uguttam kinni. Lacini, assih dhiinnixituk, cagab yekke alle yaanam lel kinni. Malammihi lel 'madaawi' (diwah takkem) yibbirhiinih alle yadiin. Amayim lel amaa obte aziyahi cilaase xagaradde hayeenih, baska, subax, iba cindhaako doorimetya kee xarich yibbirhiinih gufan macna kinni. Maddaxit darajalle, lamma gabooko, kahaalot simaagille tawce. 'Matsallal' akyan wuli kaxsat cayna lel tamidhdhige. Amaa baska, subax kee sacattohi osah lel, aziyat daraja tumbuluwih, solaadi akah tamidhdhige. Solaadi tamadhdhago kiyah laakin, mangole waqhte labcadah, mibettimta, gaxta. Akkanih amaa waqhteekoh tadabbem tane, xankabishnanah wuliidhdhak sarrah tadabbem gantah tane.

Amaa solaadi sugto tekkemko, simaagilleelih kinni sugtam. Amaa simaagille, xaalaat aythummutinnixa mitadabbe.

Amaa solaadi bishshiitoona farheenimkoo?

Milabcaadiminnamhi sabbatah, amaa simaagille akah mikabbatta. Maale, carha kodde male, niwatshshsha, akyarhxin. Laazim bishshiito kiyo yerhxemko laakin, akah yaxawna dhiican. Amay sarrah, xamit xibarah kataya sinrab kee anfag laakin yane. Nabaatih, caybe gantah kinni. Amaa umam aba xiyawtooko aganalle, amaa simaagillele cuzubamhi sabbatah laakin, ingirko akah migarayaana. Amaa gedda lel, beytiminnexemille abayishnam tashshe.

UDDC (Ummaatin Dambar Dimokraasiya kee Cadleh)-hi 23ya kaadir-hi darasatto kito. Aagina kuukyne?

Cillehniyatyeddeyamaabbe. Ta darse lel nabaatih, giraare kee agiirinnahi makaanolle udrusemhi sabbatah, feere niyat yedde yamaabbe.

Ta darsehi farhshishnan fertoh cindhamasoh, aaginah warishsha?

Cilleh farhshiisha darse kinni. Moyya tayfiddinem, fahme xiyawuh taynabem, teyrheerhih tanqaamato kuxattam, nabaatih lel alle akkuk yanem, cilish masuuliya tashshuqhuc, naba taarik le maako (Naqhfa) kinni. Umbakale cindhamasoh

lel, ta inni caashir akah attiminniye. Ta madrasa, naba kulliyya kinni. Umbakale ninni kulliyit lel unkoh, ta madrasadde geyno dhicna. Ta madrasadde, umbakale caynahi mihrar tabbuxutih, ta ardehi barhsiime shoqhle kee darajadde geytimta xiyaw kino geynam. Nabaatih lel naba reezale xiyawlih geysishsha makaano kinni.

Bukaako nable gedda, ta alle marnak nanino caalam, canki wareh yemmeegetya kinam hidhdhalle, ta kaadir madrasadde, taarik kee siyaasah, nizooba caalamti fasle kee caalamalle yane waqhaaqhac-hi sabab niirohi jaha cilleh nifhimih, addat xayla osseyaako, nefille tarishsho kurhicshishsha fahaama kito tabbirhem. Amaa gedda lel cilleh urhurh waqhtedde, xadde hinam kee dimacle irhga taqhmishse. Dhiicimak umbakale Eretriyuun fertoh lel cindhamaso, taginale darsehi caashir geyoona akah attiminniye.

Win kodde yerhxih, mudhdhug kin selimah taqhree kitoob, aaginalam kinni?

Darsi kitoobko bextih, hammi-maarihago (Saykolojji) kitoob kee taarik kitoobudde, fertoh hammiita.

Yalli kuxato, ishi shoqhle kee nabradde sareegalla geyto koh attiminniye. Gaab noh isho!

Sinni barkat!

Qayda kee Qijaajinna

Jamaal Maxammad

Mii
feera!

Cindhamasoyta Jumca Cabdu Aboobakar, cumreh 20 iggdiyaddetanecindhamasoyta kinni. Ishi, shahiid barhā kinni. Caddi-qayyix cindha zooballe, shohodat lallec-hi saadifih tekke, Eretiyat ummat, arde kee xurriya tandibbiinimko abe duffa wacishsha “inki cideyta” ta aymangadadde cudub maymanga tekkih tiymingide. Amaylih

Marxaba Jumca, ta aymangagadti ciyodde afaako, aaginah sayte?

Aymangadat ciyo caddiqayyixille shohodat lallec-hi saadifih 2018dde Cumar Cusmaan kee Saalix Ismaacilih tunkuttube “inki cideyta” suurah le shahiid amaana ayidhdho cilishtiya kinam caddossayadde kiyo, erherhihiymingidem. Rummah usun amaa aymangada yuktubiinih baaheenih nixata nokyerhxin waqhte,

mece nerhxih adde sayne. Rummah lel, anu yixayaatlih madhdhaaletiya kiitinemhi sabbatah, cilleh ikxine. 10 maxah labcadnemik sarrah, Bahta Xagoos addaraash kee shohodat qabaaralle kab ishne. Aymangad lel amakkeeko kiyo erherhishem.

Amaa aymangada arde kee xurriyat wadoh takke duffa, ayidhdha cilishtiya kinam

lel, sirii cadarti qiraa-at dhic le cindhamasoyta kinni Jumca. Ta riish kin tee ciyo tublem lel, inti alle cidde. Ardi darajah yakko akfarha yinin xutukti goron ammakakamadde, tenlih tangalo ciloh essero kab alle ishen. Jumca takkeedo, ishaddalle le dhic alle taybulluwe caashirko ractam, mifarhinna. Raadiya tekkeh lel, Asmara temeete. Ta Asmara kee Masawwacalle, xiyawko 100 takkem amaa maraadde lel, amaa ciyodde gab terhxemko khibra lem adde yengelin; 6 waqhte lel yekke “Mii feerahi” ammakakamadde, umman erherh zuurudde tillaabak yine 20ko, tiya akki abayshimolle, maddaxāh towce. Addoodim le dhibrho lel, Jumca Cabdu Aboobakarlih abne garaa katattayno.

caddossatiya kiitine. Fertoh lee koyyah amaa aymangada,

ayim koh kiitine?

Rumma kinni, amaa aymangada yoyyah tekketiya tekkeh yodde assaabbi tine. Amadde yine taariik inkoh nicaredde tanem kinni. Amaa aymangadahi dhibrho nable gedda, caduu arde kee xurriya yadbalo yemeete gedda, marcawwi xitstsinotudde ishi cibna xabah kinni, caduu deeso ishi zooba fanah yadiyem. Akah yedeekah lel,



xitstsintotudde xabe cibnalle migaxa. Beera beexa yamaato kinni yarhxe ilaltadde ani, xitstsintotudde yunkuttube barhi yoobokeh carsiime. Amooko amaa zanta rigtih yoyya tabletiya kiitinemhi sabbatah, amaa aymangada abak iniyo gedda, yoo kee yiina caredde weeca kino, asnak nininom. Gadah lee yibarhi “ee kwe ina, kwabba noh yamaato kinni yokkarhxi tiniinimko, ay geeh kinni amiite wayem” ta cindhooiki waani, anu kaa ina ekkeh aymangidik iniyom hinnim, amaa cindhooiki rummah yisacal kinamhi sabbatah, tee abah yoyyah ulah kin dhamto yoh axay tine. Nabsi wulim yodde yarhxe. Yabba kaa maarhige haniyuk, intii intille yok yamiite. Kaa teseedefem inkoh gazadde yok gaxtah, maarhige ashaxo taanam yodde amaabbi tine.

Amaa aymagadaalih yadiye cadar yakkeedo yane. “Dhimo yok tekke anu yimaacaasha” yarhxe cadar taqhriye gedda, addale dhamtodde saytah kito, taqhriyem. Amaa cadar aagina kinni? Amaa cadarti niqhriyeh, Jumca Cabdulle gaxno kino.

Dhimo yok tekke anu yimcaasha

Bar kee lallec weecadde tillaabisha

Yibakhte kinni kela, anu yaabisha

Gari nuble yaanah dirab yoh warisha

Gari anu amiite gedda

haasawa soolisha

Kuwajhe able waado, waraqhat dhirhii miishsha

Ayim kinni nisarra, xaqqe yoh mawarishsha.

Yinti kutublenkah anda kok xayitte

Yirooxi mangom kuduumute

Lellec dhumoo, baarho maxto xinte

Qalbi curfen waye, qusma obto yok xinte

Kwaasal kee kudigir soonod yokkosite.

Baskaako basak ayih afko yokxarhite.

Garbad kokko raace ayci, lakah hel ayyane.

Kusiile uybulluweh, ziyaada koh saane

Kaso dhaxiineh yabba awla yane ayyane

Barko inkim mirhiina, candadawa yane.

Ablinnan caskartok, abba ayyane.

Atu kwabbaako, cumreh ayidhdha abtak akko racte?

Aabukekkah kiyo, akko raacem. Yiina yoyyalle adooxa alsih soonowa kii kinni, yabba yistish-hidem.

Ta aymangada kee amaa aymangadadde yane cadar inkoh, koolih tadiyem kinni. Atu kwabba xayyeh kaa mitaarhige. Amaa aymangadadde laakin, kaa misli koh ambulluwi yine?

Rummah kaa misli siillelle akah yaneekahko cille meceetih, yoolih yanem yekkeh yoh ambulluwi yine.

Inki cideyta tarhxe aymangadaako sarrah kataytemille tabno. Ta aymangadalle kutublem aki naba ciyoh kufarhen. Macnaaha ardi darajah yakko akko farha yinin “Mii feera?” yarhxe xutukti goronuh akki tine aymangaditidde tangelo kudooren. Amayedde aaginah sayte?

Nookomeh adde waanisha sugne inki cideyta tarhxe aymangadadde yitublemko inketta kin Axmad Calishuum talafoon yolle abeh, taginalem taneki, tamaato dhicta? yerhxih yessere. Anu lel aymangadti ciyot farhi liik iniyomhi sabbatah, mece akkerhxe. Tayidhdho kaltam yakko, toyidhdhole daraja akah tamxawwem kinam laakin akkali miininiyo.

Erherhih tikxine woole tincibe?

Cille meceetih ikxine.

Ta lixa waqhte katattaye aymangaditidde erherhih abte aymangada, aagina kiitine? Tee dhibrhi lee ayim kuukyine? Aaginah takkem kee ayidhdhole daqhiiqhah lee akkuk yine?

Amaa aymangadat suura “Bissiraata” kiitine. Tee dhedhdhan yakkeedo, 2 daqhiiqh busa kuukyine. Amaa aymangada Saahoh kiitine. Teyya tuktubem

yakkeedo, Axmad Calishuum kinni. Tee dhibrhi lel, lamma xalaalehi zanta kinni. Amaa xiyawti kallaaxemik sarrah, kaako garbadde akraace ulwat yazhireh soonowa takke. Amaa soonoyni laakin kaatiya kinni. Ishi kaa sarrah teerhege soonoynoh xedenta. Yamiite waqhte adde yamaabbo le xeden akah yambulluwe. Tee xalaalenti lixa alsih kallaaxeeke gaxe gedda, garbi masucuta, xedente akterhxe gedda, ishi ilaale wayte radde alle yedabbe. “Akko bahte marah uttuxuu. Yim makin akterhxe” gedda, ilaale waytem akyekkih xurtaamelle ishe tagdafo roomi goronisha, tee garbadde yane ayci “Ina yoo kee isheh maamin. Anu innah kwaxaso kiyoki, texeesebeh tanitom maabin” akterhxe. Tee addaako tamiite fartoh, rummah dhaggitta. Texeesebeh tinem khalath kinam taarhige. Ishelle gaxtah, hidaaya alle obtamhi sabbatah “Abshir, innah kucarrishito kiyo. Gufanikke kuguudduso kiyo” akkarhxi, raja moorittah, ishi cindhooka carrishitto abassa.

*Erherhzuurudde, aymangaditti
ciyodde tengelemikke,
ayidhdha kiitiniini?*

100 xiyawtiya kiinine. Amaa maraako lel, 20 raace, 80nuk lel tillabne. Malammit zuurulle iymingide aymangada lel, “Istimaar kee kaxano” tatiya kiitine. Tatiya takkeedo, Axmad Calishuum Saahoh yuktubetiya kinni. Tee dhibrhi lel, liisholle tine barha tine.

Dargi nizaamhi waqhtedde kuukyine. Amaa nizaamadde reeza luukyineti, tee kixini yine. Amaa barhä, alaalihi alle ifarteh tane zibolle, inne kee nagaa terhxih qanisha kee dagar cadhdhishita alle tanelle alle yemiite. Amaa waqhteelih table gedda, xoola kinni. Magnum xoolayshitta. Usuk aaginah asse akterhxe. Ishi amo naw ishekkah, xoolah alle cununtelle tekkeh, marxaba macaaseena gee aktarhxe. Tee dhagdhaago yerhxih kab kab alle yarhxe. Naw erhex, kab yodde marhxin aktarhxe. Tee yaabbo xinah dhag tee isha gedda, nifille thuf aktarhxe. Yulgume manduqh afah alle haah, kwagdafo kiyo akterhxe. Ishi erherhille mashshiita tinemko, sarraako ulucudde dhaa haytah, labhatto tekkemko yittigiddif aktarhxe. Amah arhxi, rummaahit tee liishoyti Saciid yamiite. Lammi yangaacin. Ishi fanadde saytih, sik erhex, sik erhex arhxi, ten gica akimille tabtamko, amaa gondo dhamxishsho toohe taahe amraraddi, ay Axmad, Saciidille manduqh alle yaatuke. Saciid tee liishoyti raba. Ishi tublemih rummah taxurtumeh, “Istimaar rimidko bukkuseh kuxane kee ummat xane edebbeh kuqabrelle bandeera atkalo kiyo, arhxi dhiimo tukkusutteh, nidaalah ifarta. Ta aymangadadde adooxa xiyawtih idhdha ekkeh inkettakke baballe akkanih (live)h kiyo iymingidem.



*Erherhih abte adooxa
aymangada inkoh Saahoh
kiitine. Amaa ciyo aagina
kiitine, kolle masrawo?*

Rummah amaa daanaytidde, Saahoyti miyine. Yakko kiyah, amaa daanayti ayim yokkarhxi yiniini takkale? Nanu Saaho mirhicna, yakko kiyah, luqhah naabbemko aganalle, xarakah abta aymangagad cille meceetih nafhime, yokkarhxi yinin. Walaa koh gabbacno dhicna gantah, yokkarhxi yinin. Tayim yaanam lel, amaa aymangadadde afhime waanam mitine, macna kinni. Inkoh afhimi yinin macna kinni.

*Tookomeh abte adooxa
aymangada sittiyadde Saahoh*

kiitine. Amayek sarrah kataytem laakin, Tigriiniyalle timbiddilemhi sabbatah, kolle masrawo?

Rumma kinni, anu adox Saahoh abe. Kataytam lel saahoh abo kiyo arhxiyuk, Tigriiniya tekke gedda, erherhille rummah xankabite. Usun sinneh, erherh adoxhi kataaba Saahoh sinneh abitteenim yakko kinni, sarraahit adox lel nanu sinah naxay Tigriiniyaako Saaholle tedebbiinih abtoona kitin, nok yerhxiinih yinin. Nanu tagina akkali mafarralle nemeete gedda, amah yaanam mitane. Akim inkoh xabneh nanino. Tigriiniyah kinni abtoona litiinim nokyerhxin gedda, rummah xankabite. Rummah lel, Tigriiniyat tanto aalle waw kiyah, yiinahi luqha kin Saaho balih, cille meceetih alle enkeleelebeh, amaa usun farhan-ginah abo mirhiica yaanam liyuk iniyo. Yalli laakin yimakasafo, alxamdu lillaah ten bukadde gaxe.

Amaa asannaf/kataaba Tigriiniyah tekke gedda, raaco kiyo terhxih mimashshiitinnitoo?

Rummah erherhille mashshiite. Sarraako laalin, mashshi yixabte. Amaa asannaf “Sahle kee Zabiib”hi zanta kuukyine. Nidaaladde sittiya taarhige kaxantoolit kiiyinin. Sahle kitaab yaktabo farha yinemhi sabbatah, Eretiyat bandeeradde gerko, kulux arhxuk, amaa bandeerakke saytiya akkabah, anu kooko mibarhsima,

yirab kee rac koolih kinni arhxi, aki kaxantoole letiya balih, teyyah saanetiya balih waanisha gedda, Zabiib kaa saaxibto kaa shakitta. Usuk laakin, qalbedde luukyine kitaab yaktabo ciloh, amaa kitaaballe sigisho lemidde kinni, waanishak yinem.

Abatinin aymangaditti ciyooko tayko basoh, mangomudde tiymingide khibra lem sinlih yinin. Amaa maraalih nable gedda, atu cusubtiya kitomhi sabbatah, akkinnan sikifta liimitinitoo?

Nagaa kuukyine, akah mashshiiteekah mangom yelle masrayinna.

Mafarrit barnaamijko sarrah, amaa ciyo tookomem balih kiitine, woole sirii tine?

Tookomemko barhsah tinem kee amaa aymangaditti ciyo Tigriiniyah tekkem, amayim balih inkettat idhdhadde lallamma aymangada tekkem kinni, barhsah tinem. Yoyyah tomxowwe suura lel, “Umam mecemih kee afto” yarhxe lamma suura kinni yoh tomxowwem. Usun, ina kee abba hin xeewo kin sacol kinon. Amaa gombi shoqhle mikixina. Amaa barhä, tee sacal tee xato xineh abtam wayte gedda, ishi sacalakke atu yixatto xintemik sarrah, inni rooxe aabixih kwascaasho kiyo akteh akxinekkah, amaa ciyodde saya tanem akah warishshe gedda, shoqhle nicibi yine tee sacal darraciteh, shoqhleh ifaare. Amayek sarrah, dik

yekkiinim warishshatiya kinni. Daanayti lel anu lamma luqhah aymingidik iniyomhi sabbatah, rummah abshir, aydukum yokkarhxi yinin. Anu lel ten xaaliyo abliyuk iniyomhi sabbatah, usun yoh yaxayin mablolko, tamcem aymaaci, racto missilam lel akxabah, yok yeenim inkoh abittoh aybulluwik iniyomhi sabbatah, meceetih abak iniyo yaanam liyo.

Taginale lixa zuur abayshimeh takhrijille temeeitin gedda ayim ilaala tinito?

Anu maddaxä yakko malmamä ilaalak miiniyo. Anu ilaalak iniyom, aftitiah yawciinim busa kiitine. Yifarhi makmalinna; yalli yimmirem tekkeh laakin, maddaxäh ewce.

Aftityä hido malammaä ilaala, maddaxä kok yerhxeen gedda, ayim kodde tomoobbe?

Rummah xankabite. Baballe amaa shahaada aaginah ibbirhem gantah maarhige. Yoh toxoyin natiijah maqhnacinniyo erhxe laakin, xarhittem matamxuffuse.

Niiroh taginale ciyo aaginah table? Katatasso taxeesebe?

Yalli cumre kee caafiyat yoh yoxeemko, inshaallah katataaso kiyo yaanam liyo. Tayko naba darajalle, tacyodde amballaw farhi liyo.

Tayelle tamaato aktabte waqhaaqhac aagina kinni? Kwaaseedefiyine waqhaaqhac lee yine?

Nimujtamacalle, saytiya tekkeh taginalemille tewceh tablo yakko tayballaw, ishi waqhaaqhac lem kinni. Taginalemille tambulluwem lel, tamaa caredde nidhaltoyya noh daalisha yinin. Isticmaar cazaab, kee uma bar caddossam kinni. Amaa araxah tablem ayidhdha kinooni yaanamadde laakiin, kinni esseroth tanem. Mango mari niciboonim makin. Kaab kolle yeenih, agirä mecem abte kok tarhxem dagon kiyah, nicibon aktarhxo dhiicimtam makin. Amaylih lel, ifanihko yemeetiinih cadih, tayim tagina kinni. Tay kokkakki tane kok yaanam hidhdhah, aki araxah niya kodde badishshah, kwandafishsham mawaytimaana. Yiinak, barhä isheh fadhdhe ginah tadaw tee xaba tanito, akkarhxi yinin. Beera yan maxadde, iyyi koh yastaro kinni, akkarhxi yinin. Alxamdullilah, tayko laakin, aktabe.

Inkoh akah naarhigeekah, shahiid barhä kito. Amay tekkemik sarrah, ina kee abbat idhdha tekkeh kucarishshem kuyna kinni. Iski ishiinaalih neshsherheerheg. Kuynahi afto tayimti nasredde aagina kinni?

Ummanimko basolle, ta darajalle amaato yixattetiya, yiina yicassiina kinni. Tayim yiina nicibam yakkeedo, anu ta nasredde garay mirhaarhiyo. Yiina yifarhi tuble, amayelle yakkeedo, dhic liyom tubleh, abit yok terhxemhi sabbatah kiyo, tayelle amaato dhiicem.

Yiina lel magnum tee ashkure. Yalli cumre kee caafiyat akah yaxaw kinni arhxem.

Tookomeh, Axmad Calishum kuxatem yoh warishsheh tinito. Inkoh akah naarhigeekah Axmad Calishum masannafa, dayrekter, maymangada kee margadisheena kinni. Iski kaa kee kaa zoobih afto kunasredde aagina kiitine?

Axmad Calishum erhedhdhookotayimtanemyoh warishe. Amayek sarrah, usuk yisinnifem kiyo iymingidem. Amayim hinnim, erherhamko aykee abayshimo fanah yoolih sooleh, abshir tansaro kito yokkarhxi yaydukumusem hinnim, yaywijijihi yinemhi sabbatah, yinasredde kaa afto nabatiya kinni. Tayim hinnim, Ramadaan Ismaaciil (azhari) yakkeedo, masangaledde yok gaxeh, abshir yokkarhxuk yinemhi sabbatah, inkoh ten axmude.

Xishmale qaari, xiyawti adde ifaaremidde yansaro yekkemko, ummanimko aganalle farhi yaallo alle tane. Amayek sarrah lel, amiitinnanimidde garayeh aktabo kiyo tarhxe niya yaallem ummanimko aganalle naba xato leya. Assayyida Sacaada Mussaalihi lel tee riish kin ishi Jumca ina kee abba idhdha tekkeh carishsheyyahi xaal kee kaado adde sayteh tane aymangadti ciyot sabbatah garaa eelih abneh nanino.

Marxaba Sacaada Muusa,

Jumca kubarha kinni. Inkoh akah naarhigeekah Jumca shahiid barha kinni. Iski Jumcaalih neshsherheerheg. Jumca miyatto kinni?

Akah terhxekah rummah, Jumca shahiid barha kinni. Abbaako anu teyyalle adooxa alsih soonowak kiyo akraacem. Jumca cindhihko, ta kado adde sayteh tane ciyoh iggidinamalle hiba liitine. Wulim tarhxe, wulim gabbaaca tine. Wuli max mafarrit fasle aqhrii, qannisha ustaaz tee yuble. Amaa ustaaz akah andhaxeh, iski tamaa arhxi tinitom yoh gabbac akyerhxe. Ishi lel akah gabbacte. Amay lel yoh warishshe. Erherhille rummah madrasadde andafo adde yakkemko liyuk iniyo sikiftaako uguttamah, tee maysajjacinniyo. Sarraako laakin, tee hiba ablik iniyomhi sabbatah, tee ayfidibem erherhishe. Cindhamti ayfadab lel care kee dhaltoyyaako erherho alle tane yaanam liyo. Ta bakhti lel, gamooko yemeetetiya kinni. Axmad Calishum nelle yittisileh, taginale xaaja taneki noolih amayedde tangalo amo akyerhxe. Nanu lel, daguu waqhte nekkeleh mece aknerhxe. Ishe tedee. Tedee gedda laakin, amaa xaaja lixa alsih masolem beytam tekke. Ishi diin kee ishi caada axtirimi sanaf mibaahinna. Xiyaw waani kee xami caadalle racte. Abitem male.

Marxaba Sacaada, amaa aymangadat calallehi suura, "mii feera" kinni.

*100 xiyawtiyaako ferte
tawco tekkemko lel, abto
missilam mangom kinni. Iski
Jumca kubarha Asmara kee
Masawacalle tillasse lixa alsii,
aagina sinalle kuukine?*

Erherh waqhtelle le, adde saytem assokooti tine. Aba yakkeedo tine. Abayshimolle Masawacalle tekkemille laakin, tamaa sarsarit kee xibar, amay balih lel akah yoxoyin suura rummah daqhte alle abe. Tah yokkarhxi yanin; taginale sara sarit yokkarhxi yanin. Farhem racto kiyah, anu tayim maaba yokterhxe tittisileh. Ishi tincibem, amaa sari urhurh sara kuukyinemhi sabbatah kinni. Amaa gedda anu, tayim macalah abeenim kinni. Anu amaa waqhte, farhem abtih, ta forsa makhsarin; taginah adde atcibi tinemko, abayshimolle xabto kolle mitane. Waani kee xami sarralle ractam kinniki, abshir agiide maxabin. Atu ishe taarhige, ishi diin taarhige, ishi dik taarhige. Amay tittixiffizemko, inketti inkim kok maabaaki, abshir akkarhxi, bar kee lallecih talafoon alle abah tee ayfidibik iniyo. Usun yakkeedo yelle aba yinin. Tee farhi kee ilalti akim yakko kiyah, 100 xiyawtiyaako maddaxäh yawciinim yakkeedo, sahal makinn. Anu laakin, abayshimot lalleci amalle teelih iniyo. Agiide amiitinnanim iqhbil kiyah, ferta hambareero maabin akkarhxik iniyo. Malamä hido maddaxäh temeetemko kurhiica akkarhxi iniyo. Akah nerhxeekah

lel, maddaxäh tewce. Ishi laakin, rummah xankabitte. Amalle noolih tinem inkoh xankabiten. Tee iyfidiba kiyah, tamay afalle akmina, atin lel sinneh raja magracina akkerhxe. Alxamdulillah maddaxäh tewce.

*Jumca kubarha, baballe
umman ginale xaal
(karakterih) aymingidi,
inkettäk adoxtidhdha, hido
lammatidhdha tekkeh, wuli
waqhte xedenta, aki waqhte
kurrayta, wuli waqhte wecta,
aki waqhte lel cascax ayrhxi
tee abli tinito. Taginale xaal,
tay basoh ishi barhülle tubeh
taarhige?*

Inni barhähi xaal cille meceetih aarhige. Ishi amalle taybulluwe aymangagada kee tee sarsarit, tee weeci inkoh, xiyaw geytamah iggidinam kee rummah xiyaw taseedefem kinamhi sabbatah, weecishshamalle weecak iniyo, xedenishshamalle lel xidena kee aasulik iniyo.

*Ina kee barhä manguumulle
sittiyahi nagbe le mara kinon.
Ina ishi barhaako tadrusem,
barhä lel ishiinaako tadrusem,
mangom kinni. Iski ishi Jumca
tayedde tee tube gedda, ayim
kode tomoobe?*

Rummah xedene. Mangum xedene. Tay rummah nabam kinni. 100 xiyawtiyaako maddaxäh yawciinim dagum makin.

*Abayshimolle amooko,
nimujtamcalle saytiya tablo
kee tamballawo hiddhdhadde*

tillaabishsha farto teellemko?

Saytiya cari ifoyta kinni. Ta ifi taahiya cille meceetih hadig yerhxih kamaal yakko yekkemko lel, saytiya taqhrax alle tane. Tudrusemko ishe dhicto kinni. Ishe dhictemko lel, nabrat ruhaa yemeeteh yane, nabrat ruhaa tinniyemko lel, xawaz maaxiiteh yane, yan macna kinam kinamhi sabbatah, saytiya ishi sacalli agaagalle ummanimidde tangalo alle tane. Jumca yibarha tee bakhti akah yoxeeh tayedde garaytenkah, teeko tashshem yannawna dhiicaanamhi sabbatah, yewciinih sinne kee sinni diin yixfiziinih, wakale yabloona kee yamballawna alle tane arhxe. Xiyaw akmashshitta umaani cari addalle yakkeedo, takketiya kinam naarhgo nelle tane.

Xishmale qaari, katayteh kab tarhxo lem lel, Jumca Cabdu Aboobakar adde sayte ciyodde erhedhdhamko aykee khaatiima fanah daw aalih yerhxih, umman-ginale xato akah abak yine Axmad Calishum, kee wulimidde tee xate Ramadaan Ismaacil (Azhari) Jumca amaa ciyodde aaginah saytem, saytek sarrah akah tomxowwemille liitine dhic, aki-ginah lel ummanimih amo kin adabe kee gerhgerhti gabooko aaginah tinem noh caddoosooni kinon.

Wallaahi Jumca, ta aymangagadti ciyo tee erherh takko kiyah, agirä kinni. Taymille tamaato tekke dufla

cindhatiya kiimitine. Nifarhi kee nibahgi kuukyinem, aftityähtawcokinni. Maddaxäh laakin tewce. Amayim akah tekkem lel sarraako tee gufeh yine “xaal” tee thabiica, tee carsaa kee akimlih yadiyetiya kuukmiyinemhi sabbatah, teseedefem kinni. Amayim miilaalomhi sabbatah, xabo kiyo, anu tayim maaba gantah, terhxeh tine. Erherhishshem mixabta aynuk laakin, tee aydukumusne. Foyya makkinna, maddaxäh tewce. 100 xiyawtiyaako maddaxäh yawciinim lel, sahal makinn.

Marxaba Ramadaan Azhari, iski teeko tublemille Jumca kee tee dhic aaginah tashrixe?

Inneh shoqhli sabbatah mangomudde akmangalinnoh kiyah, Jumca maashaallah agiröä kin cindhookä kinni. Ummanimko aganalle erherhamko aykee abayshimandah teeko barhsimekkah tee aywijihi tinem laakin, Axmad Calishum kinni. Axmad akah caddoosa sugeekah, rummah Jumca kaado bilak yane xutukko, tiya kinni. Khaaliqh cumre kee caafiyat akah yoxeemko, mangomabto dhicta cindhookä kinam nubleh nanino. Jumca akah tomxowwem inketto kinni hani, adooxah affara xiyawti-dhdha tekkeh akah fadhdhaakah kutayballaw dhic le cindhookä kinni. 100 xiyawtiyaako maddaxäh yaciinim lel dhayitaanam makinn. Taymille maddaxäh tewcemih, tayek sarrah takkemille, tayko ferta

natiijalle tamaato dhictam lel, tee dhicko nubleh nanino. Jumca, rummah cibra kin cindhookä kinni. Akki tine callalledde teelih tinem tayko basolle amay yable darse beytem kee amaa ciyodde gaab terhxemm kinon. Ishi laakin, amayti cawdaati sabbatah inkim aarhigekkah, caddiqayyixko akah temeteekah kinni, adde saytem. Amaa maraako subteh kinni lel, maddaxäh tewceh tanem. Tayko nafhimem tinniyemko, Jumcat addalle yane dhic ishi caralle anuk, Axmad Calishum afo, nabatiya kiitine. Amay ayeh nerhxemko lel, ishi talle inaalih mitine, abbaalih mitine. Saytiyaako tanqusem macat kinni. Amay askimiluk, abshir akkarhxuk, bar kee lellecih teeko barhsimekkah tee yiyfidibemhi sabbatah geytime nasre kinni. Ta ciyo taahiya lel, ulah teyya tablem busa makin. Tay sittiyadde dooda tablem kee doodat migac kinamhi sabbatah, ummantiih xati farhiisha. Cindhamaso lel tee darib katawna amaanatisha.

Marxaba Axmad Calishum, nookomeh akah nerhxeekah, erhedhdhooko aykee abayshimo fanah, teeko mibarhsiminnito; adooxa darajalle Jumca abte adooxa suura yakkeedo kum kinni,



kuukyinem. Ta adooxa suura taahiya Saahot luqhah kiitine. Tayelle Jumca tuybulluwe dhic kee agiirinna, aaginah noh caddossa?

Rummah sittiya xatnemko Saahodde mango dhic le mari yanin. Caddi-qayyixille yane Ismaacil Shifa kinni, ta cindhookät gondo yoh warishshem. Jumca akyan agiro kin cindhookä tane. Tee xatanta yokyerhxe. Amaa gedda anu, ta “Mii feerahi” callalli yanem aarhigiyuk iniyomhi sabbatah, inni dhicille tee xato kiyok tamaato akkerhxe. Temeete, tee lel iysijjile. Amaa aymangagadti ciyo Saahot luqhah kinam noh warishen. Inne kee teyah lamma suura aktubiyuk, teeyimikke dayrehtin abak kinni, ta darajalle tamaato dhicem. Tee farhshiisha tinem mangom kiitine. Fadhdhtimtam unkoh laakin,

akah maabino. Akkinnanim tekkeh ta cindhookä, abitem male. Amaa callalledde tinemko mangolem sinneh ganta, tee carha (tifoozo) kiiyinin. Mafarrit zuurulle nemeete gedda, amaa suura timbiddilih Tigriiniyat luqhah tekke. Amayim kinni hanuk, aftitiyah tawco kitoki, abshir akkarhxiyuk tee ayfidibik iniyo. Amayim akah arhxiyuk iniyom lel, ta cindhookä ummanimko aganalle adabe le. Adabi yinniyemko lel akim inkoh sahal kinni. Ta cindhookä, ab akyeenim abta, xabe akyeenim, gabbaaca miracta. Akah temeetem kee tee bahtem cille meceetih taarhige. Kaso kee dhaxiine kinni, labcad aba nininom. Aknerhxe saacaako, daqhiqh micaawitta; ishi saacalle geytimta. Ta nasredde, tee thabiica rummah naba xato liitine. Anu lel abba balik, abo yelle tinem inni dhicille, akah abe, arhxo dhiica. Amayim aymih, ta cindhookä, shahiid barhä kinni. Shohodat diika kee ten cindham Eretriyat ummat-hi qalbedde lon daraja, inkoh naarhigetya kinni. Anu lel teelih abe dufla niya/damiir yoh tiyriyixem kinni. Aki-ginah Jumcat aymangadti dhic rummah barhsiimeyta kinam kinni. Yookome adooxa zur Saahoh kuukyine. Daanayti yakkoona, amay abli tine xiyaw, Saaho miyaabbiini. Jumcat aymangadti dhicih laakin, amalle tine xiyaa inkoh, weecah xinziqh ishita yinin. Tayim ayimko tekkem kinni, terhxemko lel, Jumca

akah yoxowwe karakter akah fadhdhitimaakah gannaaxishsho dhicemhi sabbatah kinni. Tayim hinnim Jumca le dhic tublem ‘Indaa Zimaam’ akyan filmidde tee yuysuqhulin. Aki-ginah, margaddelle yakkeedo, agirö kinni.

Aymangad rummah naba dhic farhshishsha ciyo kinni. Waraqhatalle koh tomxowwem, xayyeh tanemih taymingidem yaanam kinni. Tayimti gabooko Jumca baballe, aaginah tee geyte?

Ramadaan Azhari: Jumca ummanim kinni. Ummanim takko dhicta. Inki waqhtedde adooxah affara xiyawto tekkeh koh wagrosso dhicta. Aasuli sugtah, akkanih wecta. Tayim ummanti dhiicam makinn. Weeca sugtah, taasalo. Kurraa sugtah, nif fak ishsho kee mususuyto dhicta. Tayim lel amo akyaarhigin yalli ulah kin hiba akah yoxee maraako beexin mari dhiicaanam makinn. Anu inneh Jumcaalih tayim unkoh uble. Anu inneh afcaado tiririyom inne akkaliyuk iniyo. Walaa xiyaw rabteh addalle yoktassaabbem tinniyeh maarhige, dhimo thif yokkarhxi mitine. Jumca baballe tiymingide waqhte laakin, curo midhiicinniyo; dhiimo yitiscire. Amah yiishishshem lel, tee xayla kinni. Jumca adoxtidhdha tekkeh aymingidi, tee liishoyta, caduulih casbitimeh yaneti tee afalle akyigidife gedda, rabe kayyalle natsala haya, “Kwee gorone gorone” arhxi aba tine

aymangad xayyeh yane siile xangaladde kok takhluqhem kinni. Amaa saacadde amalle tine xiyawadde, weecinnexti miraacinna.

Aymangad akyaanam tayim kinni, yeenih lel, akkinnan osat mablo hinnim, amalle abaasen. Tayim hinnim, amaa daanayti, amaa wahte yeenim tine. Tigriiniya kitin hani, Tigriiniyah aba tanin hani, sin nafhamo mirhiicino akyen. Tayim hinnim daanaytiiko tiya kin Jamaal saalix ayim akyerhxe takkale, anu Saaho mirhiica laakin, atu abte aymangadko ifhimem koh warisho yaado, amaa zanta inkoh akah warishe. Amaa gedko lel tillabtem tee yiybishshire. Aymangada akyaanam lel, taginalem kinni akyerhxe. Aabbe wayna Saaho luqha laakin, naabbe Tigriiniyaako aganalle nodde dhamteh tee nafhamo dhicne akyerhxin. Baballe yane maymangadi amaa abak yanem, rummah kodde aymingide wayemko, walaah weecishsham takko taysusulem tekkimih, dhimmotto yakko taasalo mirhiicta.

Abayshimolle tarhxoona fadhdhaanam teelliinimko?

Jumca dhic le cindhookä kinamhi sabbatah, adde sayteh tane ciyo taynabo hidhdhah, darse kee khibrah darabbosso alle amaanatishna.

Mangum sin axmude; gaab noh isho!

Sinni barkat!